


^ 16
2800
1





此書乃... 卷之...

錄

國朝經籍考

16
2800
1

夏節愍全集

嘉慶十二年仲春鈔板

嘉慶十九年
六月廿日



夏節愍全集總目

卷首

欽定勝朝殉節諸臣錄

明史彙列傳

事略

南冠草原序跋

全集序

跋

卷一

賦二首

夏節愍全集

卷首總目

卷二

賦八首

騷九首

卷三

五言古詩四十六首

卷四

七言古詩二十四首

卷五

五言律詩六十一首 五言長律一首

卷六

七言律詩六十六首

卷七

五言絕句一首

七言絕句五十四首

卷八

詩餘四十一首 附詞餘

卷九

問一首

論三首

卷十

檄一首

序一首

書三首

卷末

集評

贈言

哀辭

附存

絕命詞一首
七言絕三首

七言律一首

題辭

後跋

補遺二卷

欽定勝朝殉節諸臣錄

通諡忠節

吏部考功司主事夏允彝松江華亭人博學工文為

知縣有廉能譽南都破賦絕命詞自投深淵死

通諡節愍

中書舍人夏完淳松江華亭人吏部主事允彝之子

被執送江寧不屈死

俱見明史
及輯覽

中書舍人夏宗學... 蘇州高才生張溥楊廷樞等慕之結文會名曰復社允彝與同邑陳子龍何剛徐孚遠王光承輩亦結幾社相應和名重海內崇禎十年與子龍同舉進士授長樂知縣善決疑獄他郡邑不能決者上官多下長樂居五年邑大治吏部尚書鄭三俊舉天下廉能知縣七人以允彝為首帝召見大臣方岳貢等力稱其賢將特擢會丁母憂未及用北都變聞慟哭累日毀家倡義走謁尚書史可法與謀興復聞福王已立

明史彙列傳 王鴻緒撰

夏允彝字彝仲松江華亭人弱冠舉於鄉好古博學工屬文是時東林方講學蘇州高才生張溥楊廷樞等慕之結文會名曰復社允彝與同邑陳子龍何剛徐孚遠王光承輩亦結幾社相應和名重海內崇禎十年與子龍同舉進士授長樂知縣善決疑獄他郡邑不能決者上官多下長樂居五年邑大治吏部尚書鄭三俊舉天下廉能知縣七人以允彝為首帝召見大臣方岳貢等力稱其賢將特擢會丁母憂未及用北都變聞慟哭累日毀家倡義走謁尚書史可法與謀興復聞福王已立

乃還其年五月擢吏部考功司主事疏請終制不赴及
馬士英阮大鍼亂政重允彝名屢爲好辭招之拒不應
服旣除猶不起御史徐復陽者故逆案中人至是復官
希要人指劾允彝及其同官文德翼居喪授職爲非制
以兩人皆東林也兩人實未嘗赴官無可罪吏部尚書
張捷遽議貶秩調用時論爲不平未幾南都失徬徨山
澤閒欲有所爲聞友人徐石麒侯峒曾黃淳耀徐沂等
皆死乃以八月中賦絕命詞自投深淵以死允彝學務
經世歷朝制度暨昭代典章無所不諳習獨處一室志
常在天下名旣高四方人士爭走其門書問往來酬答

無暇晷好獎勵後進有片善稱之不容口多因以成材

與子龍齊名晚節亦略相似人謂白首同所歸云子完

淳案節愍初名復字存古號小生有異稟七歲能詩文

年十三擬庾信作大哀賦案十三當作十六本集大文

采宏逸允彝死後二歲以子龍獄詞連及亦逮下吏談

笑自如作樂府數十闕臨刑神色不變年甫十八案節

於崇禎四年辛未後考功二歲殉節則爲國朝順治

四年丁亥是時年方十七此云十八誤他書或作十六

亦允彝兄之旭字元初一字伯以諸生貢於庭有聲南都

失欲與允彝俱死允彝託以妻子乃不果自此不入城

市亦以子龍故作絕命詞從容謁文廟自縊復聖位旁

附錄曹家駒說夢乙酉之秋三吳底定勢如破竹惟浙東擁戴魯藩依錢塘之險守禦甚固黃斌卿以圖練水師於舟山遙為聲援一時人心俱欲輸款以圖佐命動有謝堯文者奔走而聯絡之丁亥之春堯文抵滌闕謀渡海其衣冠頗異於眾海上邏卒詰之復出大言乃縛以見柘林守備陳可一加刑訊具吐真情隨從旅舍孫龍家搜獲所齎表文及名籍上之提督吳勝兆時勝兆反謀已決置之不問但以堯文檄府羈禁聊掩眾目而已不數日而勝兆舉事人定後殺楊海防變方司理釐追黎明而為麾下所縛矣何暇問及謝堯文事乎久繫不釋會上官至松閱囚詢堯文來歷知其以通南事敗而發覺由柘林遂從陳可一詳其顛末陳以昔日所錄副本進據以上聞土撫公同北來滿官到松按籍而求無一得脫首列者為蘇之孝廉顧咸正進士劉曙吾松董佑申袁國楠朱^來作用枚張謝石董剛皆表表有名者莫不駢首就戮而表文出於夏存古之手亦罹於禍瑗公先生之後遂絕焉案節愍之死他書皆云以陳忠裕事連及不知為謝堯文事也錄此以正舊說之譌

事略

夏存古諱完淳華亭人父彝仲先生令長樂存古從之任時八歲即能賦詩壬午冬余遊雲間謁彝仲先生執弟子禮蓋彝仲分校己卯閩闈也彝仲每見余輩必令存古陪存古時年十二歲秀目豎眉舉止一如老成人出所為詩賦相示已成帙席閒抵掌談烽警及九邊情形娓娓可聽其伯父文伯止之曰有客在座小子何嘖嘖為乙酉兵南下彝仲投汨羅文伯為諸生縊於文廟存古零丁孤苦益憤悶無聊不兩年松帥以城叛吳越諸君子罹其禍者陳臥子先生而下四十餘人時為檄

存古實為之

案節愍非為為檄而殺

邏卒至其妻家存古奮然曰

天下豈有畏人避禍夏存古哉遂被執至金陵死焉時

年十七存古妻錢氏削髮為尼生一女彝仲先生遂無

後晉江蔡嗣襄謨

夏完淳字存古考功郎允彝之子也生而早慧六歲能

詩文與嘉善錢默均有神童之譽完淳少默三歲默先

聯捷完淳尚諸生也為錢梅愛壻讀書外家丁亥四月

吳勝兆反正舉兵完淳與梅預其謀巴陳土三帥執之

解入金陵完淳拜辭其母而行曰忠孝家門事何須問

此身一路吟詩至江寧望見鍾山曰我得歸骨於高皇

帝孝陵千載亾恨及見督師不跪曰少年亦

能叛乎完淳曰爾乃老叛我忠臣何叛乎其婦翁錢梅

尚有乞生意完淳笑曰豈有堂堂罔卿而乞哀乎老

我同死耳長笑就刑年僅十八所著玉樊堂集夏內史

集同郡李之杜收其尸葬之聚寶山木末亭下邗城黃

鶴醉翁記

夏完淳者字存古華亭人吏部郎中允彝之子也年十

六從師陳子龍起兵太湖遵父遺命盡以家產餉軍魯

監國遙授編修子龍戰敗完淳走吳易軍為參謀被執

至留都經略欲寬釋之謬曰童子何知豈能稱

兵叛逆誤墮賊中耳歸順當不失官完淳厲聲曰我常聞亨九先生本朝人傑松山杏山之戰血濺章渠先皇帝震悼褒卹感動華夷吾常慕其忠烈年雖少殺身報國豈可以讓之左右曰上座者卽 經略完淳叱之曰亨九先生死王事已久天下莫不聞之曾經御祭七壇天子親臨淚滿龍顏羣臣嗚咽汝何等逆徒敢僞託其名以污忠魄因躍起奮罵不已 色沮無以應時完淳婦翁職方司主事錢梅同在訊氣稍不振完淳厲聲曰當日者公與督師陳公子龍及完淳三人同時歃血上啟國主爲江南舉義之倡江南人莫不踴躍今與公

慷慨同死以見陳公於地下豈不亦奇偉大丈夫哉梅遂不屈與完淳同死完淳時年十六先是國再變爲大哀賦萬餘言淋漓愴痛世爭傳誦別著有南冠草一卷

闕氏成仁錄

雲間夏瑗公允彝一子名完淳字存古年方典謁天才俊發所著詩文幾駕瑗公而上之瑗公殉節死存古時時慷慨悲歌會以吳勝兆牽連下獄而我婁王明先者瑗公門下士也往探之存古泣謂曰一死無恨惟室中婦方妊今以累君明先領之潛走雲間伺其妊潛抱以歸而明先亦以他事敗其友徐方平復抱之歸存古死

此子卒賴兩人以全鎮洋縣志

夏允彝有女案名淑吉字美南適嘉定諸生侯洵洵有

才早歿女遂結廬龍江撫孤守節允彝亦卜家焉繼自

龍江遷廠頭松郡兵起家屬仍避居江邨兵敗允彝與

女訣別乙酉八月泊舟崧塘佯作登岸狀出不意急赴

水水淺僅及胷低頭自伏而絕背衣猶未溼也後二年

兄之旭子完淳並以陳子龍獄詞連及死完淳有異才

年止一十有七遺腹子仍不育允彝之後遂紫隄邨志案

節愍生一女遺腹得男而殤遂無後

他書紀載不一當以紫隄邨志為正附錄季延是南吳舊語夏存古十餘歲陳臥子適至父使存古出拜案頭有世說臥子閱之問存古曰諸

葛靚逃於廁中終不見晉世祖而稽紹竟死蕩陰之

役何以忠孝殊途存古拱手對曰此時當計出處苟

憶顧日影而彈琴自當與諸葛為侶臥子歎曰君言

先得吾心者又存古童年好閱邸抄便能悉其首

尾一時歎為奇童徐閣公來晤適瑗公頭暈先使之

出拜閣公與談千餘言存古酬對多作常語而自然

抑揚可聽閣公既出其師某曰奈何不出入經史略

標才藻對曰昔管公見單子春猶能少引聖籍多發

天然小子何敢作餽伎倆唐突先輩閣公聞之曰

後生中有此人我幾社旗幟所嚮天下雖多才亦未

易竭其輸攻也又崑山葛靖調挾一客龔姓者至

雲間晤夏瑗公瑗公偶出存古方六歲聞為葛也乃

披衣出迎時瑗公時藝半為他人借刻靖調戲曰尊

公近日何以喜為裁翦存古請故靖調笑曰不然窗

稿多為他人作嫁衣裳存古對曰幸有

未去葛龔者得稍遺一二耳靖調絕倒

南冠草原序

壬辰冬偶遊四明與朱陸諸子論甲乙以後忠節及松江諸公余言夏瑗公死最先其子完淳字存古以十七死其人其文古未有也諸子請其詳余曰存古五歲知五經九歲善詞賦古文十六十七與友人有事吳中會江東有詔謚瑗公師文忠蔭一子中書存古乃上表及疏稱中書臣完淳死以進報某虛實約兵以某日航海會某所爲邏卒所獲就鞫金陵某某欲活之曰汝年少豈知兵存古曰吾年少豈遂不知兵某曰汝口何不惜汝身曰倘死而復生他日必先文忠與我也身何

夏節慈全集 卷一
足惜因顧謂其婦翁曰男兒死耳何能作求生狀遂就
義於金陵之西市諸子曰有是哉恨未見其人也其疏
及表在乎余曰微獨疏表在向余過武水蔣氏兄弟見
存古有大哀賦有獄中上大恭人書寄錢孺人書有示
同事諸友書有自訂詩近千首此存古之文也已又得
其南冠草因出示諸子諸子請歌之余爲之歌別雲間
諸子曰壯哉往而不返者也何鶴唳之足悲乎爲之歌
辭恭人曰哀而不怨太恭人有子復何恨爲之歌寄內
曰嚴而婉責其婦以程嬰乎余輟歌曰存古死而遺腹
得一子一女案本集遺夫人書上有雙慈
下有一女則女非遺腹矣天之報施不

爽哉爲之歌寄姊及甥曰甚矣哉大仇其可忘乎爲之
歌寄半郵及聞大鴻訃曰其皆死心乎是知生而知死
者也爲之歌細林曰知大夏者其孟公乎非孟公而細
林之哭誰能若是爲之歌遇九高及轅文曰是真可以
告朋友乎又何知友之明也爲之歌入京及被鞫諸什
曰至矣哉烈而醇苦而甘怨而溫直而不屈勇而不懼
靜而不亂思而不貳求仁而仁取義而義惟故國之傷
也以忘其身與家如存古者忠孝兼之矣而以十七傳
古今未嘗有也南冠草者可以名存古之人可以名存
古之文矣因手訂之而命余爲序桐城方授子畱

鳴呼此夏子絕筆也余讀而歎曰忠孝也經濟也文章也至夏子而觀止矣乃其年更不可及也國初沐黔寧鄧衛公俱以十六七垂功名而文采或不彰解吉水年十八上庠西封事萬言乃不死爲周紀善作傳有遺議焉王義烏使諭滇南詈脫脫以死至今生氣然年五十餘矣若夏子不更奇哉嗚呼本朝非無事也使夏子不生於今日何必不與金華當塗以文章開草昧不然何必不與北地瑯琊以翰墨潤太平卽欲以盤錯顯則何必不於己巳己卯之間附忠肅文成以自見卽不幸而以死殉乎則何不於靖難之後與方練諸公同碎首而

乃生於斯世也不亦痛乎

一作哉

余用是悲其遇慕其人

而不得見將見其詩若文全集又未遑得則先梓此南冠草是亦丹穴之片羽也然亦可從斯以見夏子矣明州陸宇燦明懷

國家之故非一要必有忠孝卓犖之士生之也功不必其成也故博浪之椎奮而祖龍之氣奪卽身亦不必其生也歌平陵東者不絕於耳而後南陽之氣振是世之升降如粉本而人之生死成敗於其際者如青黃焉丹雘焉非然則史冊亦幾乎寂寞矣昭代自甲申後有志者欲自振拔其人益張事益奇爲史策生色益絢夏子

夏節愍全集 卷首 三
存古其一也或曰惜也人固不可無年以夏子之才而用諸老成功名必有可觀或曰悲哉夏子生不辰漢文有言子當高帝時萬戶侯何足道或曰惟瑗公先生之文爲談爲彪惟夏子之文爲遷爲固藉玉步不改著書石渠天祿聞詎非一代光悲哉夏子辰安在或曰夏子過矣何不隱忍以待功臨耿鄧而一蹶不收盛事不再若然是悲夏子之身死而功不就也是欲忠孝卓犖之士必生於功名之會也乃夏子死而甲申以後藉以不寂寞則死有時賢於生而功何必不在天下哉今其詩具在使後死者知甲申之後猶有人則天下方在夏子

之青黃丹雘中又何事爲惋惜也蛟川范兆芝香谷

原跋

陳夏文章齊名海內幾三十年矣昔常一謁陳先生先生神宇嶽嶽望之心死用是益神往於夏先生甲乙以來兩先生相繼死節益爲華夷萬禩重齊名又不僅以文章矣及讀南冠草斂容起曰兩先生亦厚幸哉始同郡同學同負物望又同中春官同盡節死兩先生亦厚幸哉不謂夏先生之後復有存古中翰也雖然父子朋友之間氣自相貫有陳先生必有夏先生有夏先生必有存古中翰特未知陳先生有子得如存古否余又因

存古而益神往於陳先生之令嗣矣我友范子香谷陳先生門下士也試爲我問之四明董劔鏐佩公

余少時讀夏陳兩先生制義謂先生文人也至其家京師四方以書來者日數百函先生應之無倦竊意先生喜交游人也孰知秉浩然之氣臨大節而不可奪如斯孔文舉殞身曹瞞二子俱幼先後從容就義彼存古者奚愧焉歲寒知松柏諒哉武林蔡嗣光良木

夏節愍全集序

陳忠裕集之得成也莊君

師洛

接輯之力居多何子

其

偉

編訂而刻行之誠藝林佳事哉然余又思夏忠節與

忠裕同爲幾社友亦屬莊君輯其遺文而忠節砥行立名不欲以文章著故所作除壬申文選外無多傳惟令嗣節愍爲忠裕弟子年少才高從軍殉難其人其文千古未有爰與莊君於明季諸人殘藁中零星采掇有所獲必互相校勘積時旣久遂成卷帙辛酉春余主講敷文書院出其藁令吾宗

鴻達

手錄一通并做忠裕集之

例略將時事附註以罣漏尚多不與忠裕集同時竝彙

後何子續得其遺詩卅餘首及詞餘一種增訂重編釐
爲十卷而詩古文詞始燦然備矣余年老目盲弗克細
校仍屬莊君始終其事昨何子以書來告將與忠裕續
集同授諸梓所謂有志者事竟成也爲識其顛末如是
嘉慶十一年丙寅夏四月青浦王昶書時年八十有三

跋

余輯陳忠裕集後兼輯夏節愍詩文零星掇拾積之既
久遂哀然成集然所得俱係鈔本亥豕魯魚不可枚舉
自是每得一本卽互相校勘善者從之疑者仍之雖未
能一一無憾以視他本之闕譌滿紙似爲少勝述庵王
少司寇曾經鑒定爲作弁語愆忠何生其偉與忠裕續
集並刻行世而何生適丁父艱卒卒未暇因以此集轉
屬陳生均生亦好古士也慨然任之遂同何生編訂付
棊仍倣忠裕集例略加考證焉余嘉及門之踴躍從事
俾前賢著作不終散佚爰述其顛末以見成之不易云

嘉慶十二年丁卯春正月婁縣莊師洛識

均承泖客師命刻夏節愍全集因伏而讀之歎其天生
異才而適丁百六之辰年纔十七卽致命遂志爲可悲
也然論者謂忠節旣抱石沈淵節愍苟韜光匿采則夏
氏宗祏尚可絲延一綫而乃參吳易軍上唐藩表卒以
此被戮似非明哲保身之道不知人各有志節愍之奮
身不顧根乎天性故其忠肝義膽發爲文章無非點點
碧血所化顧可令其湮沒不傳與此吾師闡幽之微意
而均亦幸綴名簡末者矣爰書數語以誌私心景仰焉
嘉慶十二年仲春月婁縣陳均跋

雲輪閣

夏節愍全集卷一

荃露

青浦王述庵先生鑒定

婁縣莊師洛菴川輯

受業

陳均秉衡何其偉韋人編

賦一

大哀賦 并序

粵以乙酉之年壬午之月玉鼎再虧金陵不復公私傾覆天地崩離託命牛衣巢身蝸室一作舍 弔東幸之翠華蒙塵軹道望北來之浴鐵飲馬姑蘇申胥之七日依牆秦庭何在墨允之三年采蕨周粟難餐黃農虞夏遐哉尚友之鄉南北東西渺矣容身之所在昔士衡有辯亾

之文孝穆有歸梁之札客兒飲恨於帝秦子山傷心於
哀亂咸悲家國並見詞章余始成童便膺多難揭竿報
國束髮從軍朱雀戈船蕭蕭長往黃龍戰艦茫茫不歸
兩鎮喪師孤城潰版三軍魚腹雲橫歇浦之帆一水狼
烟風動秦房之火戎行星散幕府颯離長劍短衣未識
從軍之樂青燐蔓草先悲行路之難故國云亾舊鄉已
破先君絕一作命哭葯房於九淵慈母披緇隔祇園於
百里羈孤薄命漂泊無家萬里風塵志存復楚三春一作
秦壁壘計失依劉蜀市一作帝一作子規千山俱哭吳江精衛
一水羣飛哭海島之田橫尚無其地葬平陵之翟義未

有其人天晦地冥久同泉下日暮途遠何意人間魯酒
楚歌何能為樂吳歛越唱祇令人悲已矣何言哀哉自
悼聊為此賦以舒鬱懷嗚呼黃旗紫蓋雪戟霜矛何以
南朝天子竟投大將之戈北于遂繫降王之組豈
高廟之馨十七世而旁移孝陵之澤三百年而終斬乎
一作耶一作此天時人事可以疾首痛心者矣國屯家難瞻草
木而撫膺岳圯辰傾覩河山而失色勞者言以達其情
窮人歌以誌其事追原禍始幾及千言寄愁心於詩酒
阮籍窮途結豪士於屠簫張良倉海後有作者其重悲
余志也夫

維昭代之代興也乘土德而紹王麗旭日而承天迺執
柄以司命聿嶽鎮而辰懸掃旄頭以靜衛鞭角端以定
邊窮邛笮通浪立朔方大出南交凱旋崇文會武東鯨
西鷁閱兵則法高司馬論都則賦雄孟堅備禮樂於虎
觀絕烽火於狼烟法不更而澤久兵不耀而威宣儷唐
虞而比德尚殷周而卜年不意瑤輪無長炯之期玉歷
有中屯之會天子端拱無為塞聰而治羽獵灰五柞之
場歌舞納三雲之地震筵分枯苑之形泰階起蜩蟬之
異議論廟謨干戈兒戲有道詠瞻烏而長歎索靖指銅
駝而下淚山未頽而黯然海不波而潛沸然四極未虧

三倫不易草木寒於北街星日輝於南極閭左多遊俠
之徒京華無憔悴之客迨 虎帳不朝 漁陽直

入遼水無聲醫閭慘色 之部封豕長蛇之力

徒帳幕南空羣冀一作漠北中行之背未答趙信之城再

立使我燕領龍韜霜戈雪戟出榆塞而草黃墜犁天而

雲黑翻添月窟之哀長有陰山之哭於時五帥不咸一作

歸 三城莫復 在背肩 侵一作親肘腋元子所以傷心

江統於焉太息且也朝堂多水火之爭邊徼有沙蟲之

戚未拜郭隗先誅李牧熊羆夜而星淪猿鶴秋而天覆

自蔽日之借叢卒終星而喪國繼以中常侍之竊政大

長秋之尸祝聖燒定中禁之謀節讓起北宮之獄顧廚
禍酷於三君累若權延於五鹿璿庭之璧月幾淪虞淵
之曜靈不浴孤臣飲恨於屬鏤碩士含辛而囊木況夫
疆場多事邊境傳烽恒落魚門之胄空誇馬服之功衛
青未聞其魏絳不見其和庸邀汗馬策賣盧龍

及夫星明少海天浮大潢殷丁河毫之志周宣江漢之
風誅司隸之王甫焚誣史之蔡邕然兵由弱積政以賄
崇敝算不能止宣房之決勺水不足息驪山之紅見伊
川之披髮鳴天山而掛弓箭鼓震於遼陽旌旗一作明
於塞上問九鼎之重輕窺三川之保障嘶風則首藉干

羣臥野則駒駝萬帳定遠非萬里之侯驃姚無百戰之
將登陴而魚鑰倉皇入援而龍旂震蕩郅支絕之

期介子斷之望衛丁零叛於東膠毛修之亾於樂
浪非無刁斗之將軍尚有綸巾之丞相山鳴石鼓宿動

金精三輔之蕞蓬春牧諸陵之弓劔宵驚降將雲帆北
渡賢王寶馬東征方將鴻雁集其安宅一作集于中澤驚鸞奏

其昇平列九賓而告廟開八門而受寧忽焉五斗米之
教起三里霧之術成秦晉蜂攘豫楚蟻營中橫淝泗南

極湘荆元帥給雲臺之仗尚書開武庫之兵或墨衰以
蒞金革或班劔以任鼓鉦卒之黃巾黑犢之屯聚青袍

白馬之橫行王曰叔父君之寡兄或嬰白刃有結丹纓
 赤社隳而青茅廢靈光頽而茂苑傾式虧國族深軫宸
 情祭通侯於太牢束帛戍王人於揚水流薪帝子沒而
 烟凝一作微南浦王孫隕而草徧空城盜長陵之抔土傷
 神州之陸沈彼何人斯哀哉至今矧夫上谷為鼙鼓之
 場北海無龍蛇之陣李都尉部曲不一作忘歸陸平原風
 流頓盡歎馬陵之道窮絕龍城之宵遁國門則畫策萬
 千旌節則功勳尺寸干城為矛戟之讎一作仇酖毒是鹽
 梅之分恒見恥於少卿之書非所望於錢神之論聖人
 勵玉衣一作衡而靡替垂翠裘而獨悶便殿空談平臺屢

問賜金罍則執政為貴人之牢望山頭則廷尉皆君子
 之吝然主威雖上法武宣一作宣武臣德實遠慚廉藺使臂
 逆而更難養癰潰而莫吮所以遼水東西人多犯順大
 河南北野皆餓饑黑山藉以益繁赤眉一作尤來聚而愈迅
 遇王師如秋風之捲枯一作籜下堅城若朝霜之悴菌赤
 羽動而北馳黃金鳴而西振封函谷之一丸據雍州之
 九郡城郭胥淪衣冠偕殞犀兕有未贖之華元丹青有
 不歸之于禁既度陝而叩關復踰河而入晉三千屬犀
 之騎十萬迎風之刃黃金臺之蔓草空哀白玉仗之春
 采俱震地坼天崩海焦星隕蚩尤之毒霧彌天軒轅之

鼎湖虛殞恨黃竹於千秋悲一作落蒼梧於一瞬椒宮為

血淚之湘君鶴駕有呼魂之子晉弔望帝以何期矢叩

闕而難進可憐淚雨之昭陽更有風塵之長信桐棺墮

馬鬣之封柏路捲一作掩龍輻之輻嗚呼一本無此二字當斯時

也四海驚飛三靈恫震溘靈飆而大招弔五雲而長恨

天上將軍之鐵馬呼風宣陵孝子之布衣扶櫬三百年

玉塵晝移十六世金鋪夜燼且也劉太尉留於薊北瑯

琊王渡於江陰哭秦庭而歸虎穴卜周鼎而陷龍滸秣

陵王氣則黯然欲盡易水寒風則悲哉正深將軍之大

樹北偃之部曲西臨假號子輿於城下不立盧芳

於雁門借蚌鵲之利逞之心北闕之樓臺凋謝西

山之松柏蕭森太液翻而石鯨慘淡茂陵廢而玉盃浮

沈瞻河山而隕涕撫草木而沾襟雖君仇之少雪實國

難之相尋郿塢為然卓之地漸臺興剗莽之軍既追風

而西捷遂射日以南一作東侵使南朝天子北府大臣烏

衣則披綸揮羽黃葛則懸膽臥薪器成錯節聖啟憂殷

祖士稚雍州出牧劉奉春冒頓和親組練餘腥者八百

里鮫皮犀屬者十萬人庶幾一本無此二字佛狸無飲江之志

老羆成臥路之動而乃東昏侯之失德蒼梧王之不君

玉兒寵金蓮之步麗華長玉樹之淫柏梁建章則讀西

京之趙鬼臨春結綺則號學士之孔嬪吳歛越豔魯酒
梁樽先見乎玉杯象箸復徵夫酒池肉林問蛙鳴於爲
官爲私御龍袞於若亾若存視江都而未武擬長城而
不文冠蓋之銀青俱滿朝堂之銅臭相因但知安石之
賭墅何止元規之避塵楚囚無新亭之淚越絕非石室
之音南徐之兵甲不勁淝水之草木無神拜蔣侯爲靈
帝弋白雁爲國賓柱石則孔愉江總閩外則祖約王敦
將相盡更始之羊胃衣冠多南渡之雁民宐其及矣况
有強鄰於時清人河上之師天寶通好之使未許其冠
帶春秋遂至夫荆榛天地蘇屬國之旄節終畱庾開府

之江關永棄移貂帳之千里逐龍駒之萬騎投鞭則淮
水不流飲馬則長江無際白羽死夫孔明綠幘亾其道
濟嗟乎揚州歌舞之場雷塘羅綺之地一旦烟空千秋
景異馬嘶隋柳之風蜃吐海門之氣潮上廣陵而寂寞
枝發瓊花而憔悴鉅鹿沙崩長平瓦碎 相臨蛟一作

鮫 兕俱退鬼有曹社之謀天同鷄首之醉欃槍空鐵甕
之城弧矢落金山之壘天子蒙塵將軍仗義軹道降王
長安舊帝朱組輿襯之羞青衣行酒之事一作白日蒼
茫黃雲迢遞月姬之錦瑟新調代馬之丹鬣乍繫玄武
池邊景陽宮裏莫愁之歌舞一作何如長樂之鼓鐘一作

鐘已矣斜陽歸而燕子秋飛蔓草平而後湖月起秦淮
 則一點青烟桃葉則三聲漁市靡蕪徧於故宮莓苔碧
 於舊內一作址平康之絕巷雞鳴鍾嶺之空山鶴唳風塵
 蕭索兮十二樓烟雨淒迷兮四百寺烏啼上苑之花鵲
 噪孝園之樹故老吞聲行人隕涕殷王子麥秀之歌周
 大夫黍離之淚天地何心河山無一作奚罪若夫龍種困
 而被奴鷄儀降而為婢逐燕支而上馳抱琵琶而北去
 黑山之月年年青冢之花歲歲室處有 毒之 髮
 有 之累於是竿木羣興風雲畢會與六月之師振
 九天之銳橫海伏波戈船下瀨軌亾秦之陳勝效安劉

之翟義誅殷通於戲下斬王一作甄阜於帳外青雀烟騰

黃龍雲邁夸父有投杖之心魯陽無挽戈之計兵弱

強地柔人脆傷心夫王子白衣絕望於將軍蒲類田橫

之五百軍人項籍之八千子弟平陵東而黃犢可賣大

澤左而烏騅不逝天蕭蕭兮不明日荒荒兮一作其欲瞠

傷兩鎮之未旋痛孤城之已潰聞楚歌則部曲蕭條聽

胡笳則征夫歔歔國殤怨而陰雨深戰鬼哭而愁颯厲

烟草依然江湖如是毅魄歸來一作東歸靈風涕泗至若江

關不見鄉國何方坑既酷於新安火復烈於咸陽谷水

無浮雲之使崑山非行雨之鄉姑蘇烽火檣李蕪荒草

入語兒之館月明響屨之廊美人則紫臺黃土英雄則

白草青霜風何為而慘慘雲何地而茫茫禮魂兮春蘭

秋菊弔古今山高水長悴瓊枝而無色零瑤草兮不芳

三秋桂冷十里荷香

一本作陵谷變遷松柏荒涼

景光黯黯兮銷魂

烟波漠漠兮斷腸夜不寐而耿耿淚沾襟而浪浪何日

度鶯花之月何年歸玳瑁之梁燕巢枯柳蝶舞空牆壚

頭無小婦之酒城東非少年之場舊遊零謝獨壘荒涼

歸去則杜鵑啼月力微則精衛填江況夫國屯家難先

子云亾訪彭咸於葯室從墨允於首陽畱遺孤於廬堊

曾仗劔於戎行濟雲帆之無路匿土室而自傷王章之

牛衣空臥馬卿之犢鼻頻穿王尼之車長宿范曄之麝

空懸任西華單衣見肘孫叔敖餒鬼誰田弱齡則海籌

十六短髮則霜鏡三千惟我生之不振丁窮酷之蒼天

若乃天南鼎定瀕右龍騫劉文叔南陽白水越句踐采

葛飛鳶乾坤重照日月雙懸湖中賈勇內地爭先司馬

秉中軍之鉞虞人麾

一作司

上將之旃

一作權

三吳漁獵七

郡風烟扁舟勢疾三鼓氣堅余乃飄搖澤國躑躅行閒

飲君親之夙恨鬱家國之煩寃短衣則東州亾命長戟

則西掖備員既有志於免冑豈無心於喪元伍大夫昭

關馬渡張畱侯滄海龍潛紈綺非封侯之骨漁樵當用

武之年千里之月明鼓角五湖之春泛樓船魚龍蟠於
甲帳裘馬壯於戈鋌錦韞瑜三軍高宴金叵羅諸將扣
舷旣充下乘敢託中涓草檄則遠愧孔璋入幕則深慚
仲宣濤寒震澤風厲由拳秦帝之椎未中楚王之墓不
誰一作鞭時無文范人乏策權龍衣逝矣魚服困焉吳明
微之功名何在秦武陽之拳勇堪憐吳要離矛因風轉
楚龔勝膏以明煎高漸離之筑聲往矣徐夫人之匕首
依然亾楚之功不就報韓之志誰一作傳兼以五馬則
寡君雲夢六龍則天王翟泉三戶亾秦之讖九歌哀郢
之篇功成姬一作館一作芊名假蘇燕義公旣劫壯夫不還王

襄則蓼莪三廢夏馥則傭保十年入林自愧夫介推蹈
海深慚於魯連管寧卓帽箕子朝鮮烟斷營門之柳霜
凋幕府之蓮國亾家破軍敗身全招魂而湘江有淚從
軍而蜀國無絃哀哉欲絕已矣何言嗚呼余生於烈皇
之朝長於聖安之世佐威虜以于征從長興而再起追
懷故君何臧何否言念舊臣何功何罪或盱食而宵衣
或墮簪而遺珥或麥飯以自嘗或肉糜之堪恥推本先
朝追原禍始神宗之垂拱不朝熹廟之委裘而理罪莫
熾於趙高害莫深夫褒姒惟屈釐之下獄與朱浮之賜
死雖大臣之無刑非聖人之得已至於五世偏安三朝

舊事指觸瑟爲貞規目一作斥采芝爲佞軌使之北
風陷泥塗於南紀殷深源之方略空空王夷甫之風流
爾爾若乃威虜偏裨長興文吏原非將帥之才未有公
侯之器興懷鴻鵠之言頗見龍蛇之志日日胡牀之臥
夜夜釣天之醉旣一戰之未申淪九死而靡悔黃土一
抔丹青萬禩余草木門庭旂常家世家淑人黃鵠之悲
先文忠白虹之氣非無德曜之妻尚有文姬之姊衣冠
列於杜曲姓氏通夫槐里寄食無鄉望塵有地范丹之
甌長寒卞彬之蝨未棄達士窮途之悲壯夫歧路之淚
載念簪纓言懷邦國恨欲言而聲已吞愁將訴而淚沾

臆何必雍門之琴無假武陵之笛日月如馳親朋不識
獨劔空囊三江浪跡人容鼓史之狂世笑愚公之瘁混
緇羽之高賢結屠簫之豪客三桑無再浴之期一飯有
千金之值望舊鄉而雲影蒼蒼弔故壘一作里而風聲惻
惻蔣詡之徑不開王猷之舟時出秋水迢遙寒林蕭瑟
野獸暮號羣鴉晚集鶴一作雁唳霜驚一作清鷗眠月直過
耳傷神仰天太息山氣兮江光春陽兮秋色嫖姚空舊
築之壇郎將有先陪之戟蛟龍非遇雨之期鯤鵬無御
風之力韓王孫之城下知已誰人宋如意之堂前傷心
何極下江但見夫綠林圯橋未逢其黃石此孤臣所以

輟食而拊心枕戈而於邑者也

朱彝尊云存古南陽知二江夏無雙束髮從軍死為毅魄其大哀一賦足敵蘭成昔終童未聞善賦汪疇不見能文方之古人殆難其匹

寒泛賦

若夫河海之廣雖折葦而可杭江漢何深亦浮杯而可渡況乎方舟一葉既無濡軌之憂野航雙槳堪問迷陽之路能無弔西方之芳草慟哭途窮傷南浦之寒烟淒其歲暮者乎余也敝裘風宿短髮霜侵北首而懷漢臘南冠而詠越吟夙昔波濤之命平生江海之心雖宋玉悲秋戒遊魂於湘浦而王猷泛雪還一作適興盡於山陰

矧乃擊水三千嘯巨鯤於溟壑通衢十二泣枯魚於釜鬻仲御則海濱擊楫伯牙則水仙鼓琴涉江避世不厭其深者也爾乃飄零殘臘躑躅窮年冰池翠潔寒江碧鮮木蘭倚棹芙蓉刺船鸚鵡烟波之艦鸕鶿風雪之天呼豨則布帆無恙欵乃則輕橈宛然駕漆船而非神乘蠡舟而不仙三江落梅之雪五湖衰柳之烟度空城兮蕪郭凌大浦兮寒淵秋蓬亂飛古木微脫寂寞潮迴蒼茫雲合江鳧浴其平沙寒鴉噪其晚葉動曉氣而連吳弄烟光而平雪可以遠遊於焉寒涉苦匏浮水之罌桃葉渡江之楫荒荒宿雁之霜慘慘蘆花之月長天勁隼

空汀孤鶩楓湛湛而流丹鷗亭亭而失素數聲出浦之

漁歌幾點平原

一作郊

之鬼火迷青雨於荒洲斷黃雲於

古渡天雞之響不窮海鶴之飛無數荒邱

一作邨

無字之

碑華屋何人之墓隱隱遙山蒼蒼平戍傷心半死之藤

蕪滿目無花之古樹弔故

一作孤

渚之秋蓮訪芳洲之殘

杜旣擊汰於迴谿復停橈於歧路猿噉噉而呼風天低

低其如霧柴門半掩之野人椎笠相逢之漁父烟水則

羊裘見尋風浪則鳴夷未遇衛邱一節之竹南華五石

之瓠禦寇之風冷然子胥之潮時怒度舫影其若搖泣

榜歌而如訴清商之曲不調子夜之聲數誤魚無情而

仰沫鳥欲飛而難度加以菰蘆亾命風波逝魂慌悴江

潭之客髣髴蘆中之人驚颿朔雪桂柂潺湲糾糾葛屨

之公子靡靡衰草之王孫澄江兩楫寒酒一樽月隴隴

而虛朗烟漠漠其黃昏霜滿烏啼之夜風高鶴唳之邨

魂消易水腸斷夷門瀨女以壺漿託命漂母以一飯畱

恩抑古今之殊軌豈窮達而同論昔芳景之盛年麗風

花於江表三春鬪草佳人二月踏青年少綺羅彩舫之

徘徊簫鼓畫船之繚繞柳絲春斷梨花風曉夜夜合歡

之花處處宜男之草醉殺莫愁之湖夢盡江南之道雲

水迢迢秋光渺渺迴鳴鶴之吳舟激采菱之越棹隔浦

紅蓮牽舟碧藻錦帆之月虛涼綵一作纜之風微裊歌

舞如灰鶯花已老訪青翰之鄂君挾西冷之蘇小至若

餘艖春泛組練秋明三千水犀之甲十萬伏波之兵黃

龍烟邁青雀雲平軍中鮫屬帳下龍旌火攻下策澤國

長征蘭帛一作之帆如月露橈之壁為城倉海君之意

氣桓靈寶之功名三百九橋兮寒雨白七十二峯兮曉

烟青連洪濤兮廢壘積荒葭兮故營滄波不極烟月無

情綠沈冰斷寶刀夜鳴哭樓船之楊僕葬海島之田橫

落霞飛而天斷斜月動而風清興懷三婦之豔再感五

侯之鯖亾澤中之桓楚剩江上之陳平祖逖則臨流欲

渡范蠡則沼吳未成博昌之船已廢潯陽之艤無聲未

受靈威之簡難逢蒼水之精榜人再唱客子數一作驚

小海則烏鳶已厲大山則桂樹猶生煩鬱江魚之婢浩

蕩海鷗之盟前鯢鯨而後鮪鯨弄江華而拾水英雖欲

乘槎而問天不禁零淚之沾纓也

夏節愍全集卷一

夏節愍全集卷二

青浦王述庵先生鑒定

婁縣莊師洛純川輯

受業陳均秉衡編何其偉韋人

賦二

江妃賦

金風勁兮秋水多
楓湛湛兮江始波
羣芙蓉兮愁日暮
泛清光兮蕩綺羅
歌采蓮兮相思苦
烟漠漠兮迷南浦
送夕陽兮迴舟愁
脈脈兮不語餘霞散
綺碧江舒練流輝
軼光參差曼眩宛
輕颺之髣髴悅明霞
之離合蔽菱然之菱
一作靈 悤駕偃蹇之蕙楫
一江皋之麗人窈亭亭

而獨立秀爛發而非聲光四耀而無質烟霧微含乍近
乍遠雲霞燦姿或舒或卷懸淵客之明蚌蒙鮫人之素
綃的灼兮若菡萏之擢水一作濯波飄飄乎若楊柳一作柳枝之
凌颿惠秀中豐明豔外發秋娟娟兮卻月眉春宛宛兮
凌波韞約雲鬢而如薄被霧縠而若無一作延迴窈窕之
明眸逸連娟之曼蛾弄潺湲而微步啟丹脣而竄笑倩
美盼之一迴迴餘輝之四照乘蘭輶其九氣服靈衣其
五銖稱天孫之襄錦曳緜母之翠裾笑漢女之解佩嗤
宓妃之贈璫陋巫陽於神女鄙素蓮於西王一作方目曾
波兮微睇精駘蕩而中疑守水精之絳盤定明璣而不

移於斯時也

此句一本作於時二字

肅惠風而往來整玉軟而徙

倚拂瓊枝之珊珊蕩輕雲而裔裔玩江華之石英娛秋
光之寂寥感鄙人之目成託微詞以見要踞臨風以致
辭懷素娥之微歡翳脩裾其如月吐芳氣以若蘭凌微
澗其未翔采翠羽以相寄悵陰陽之永睽悲嘉會之長
棄乍容與於江干倏停輪於山椒神熒熒其未止光煜
煜其忽搖右睨上元之冠左挾湘靈之袖婉閒閒其笑
言翩善睐而色授爾乃轉盼未終流光四迸迅如有神
飄若無影遙欹耳而遠聽隱絳鸞之啾啾風靡靡而微
動江湛湛其安流驚衆暉之雜還泛幽光之有無波鱗

鱗兮長往日渺渺兮愁余出浦兮素月流迴船兮碧雲
合呼榜人一作夫以問之迺緩歌而見答其辭曰沙棠楫
兮江上寒芳草歇兮懷所歡千里兮滄江萬重兮碧山
江妃歸去兮無處所朝雲暮雨兮畱人間

寒城聞角賦

朔風起兮天末遊子行兮未歸望舊都兮無極思故鄉
兮永違浮雲亭亭而去馬頽陽蕭蕭而入衣皋禽歸而
爭宿寒獸走而因依短衣迎寒僕夫苦飢乃解霜鞍肅
星飯張虛牀坐閒館銀釭半明金鑪不煖素河自流華
月空滿覽寒城之迢遞聽清角之悲惋哀響乍急愁聲

頓緩激寥亮而鳴鳴遲徘徊而款款絳霜已淒碧雲微
卷天茫茫而逾高水悠悠而彌遠曲節微聳淒音忽斷
啼猿則三聲月裏落雁則萬重雲畔草白烟黃山光水
淡嘹唳而氣激白虹蕭條而聲流清漢變徵激烈清商
宛轉和塞上之胡笳協隴頭之羌管齊急節兮城頭寒
颿厲兮颼颼雲低回而不度江嗚咽而不流角弓勁兮
寶刀嘯邊馬嘶兮征夫愁明關山兮不夜肅天地兮長
一作秋山鬼吹燈而其語青燐散野而未收烟平一作橫
蒼戍月古空洲家家擣素之石夜夜流黃之樓耿星漢
而露一作淚下怨關山之路修忽一聲之欲絕傷九迴而

逾道驚半夢於金微墜雙淚於玉鉤蕩子邊庭征人隴
右柳葉衣兮漢月薄蓮花劍兮胡霜厚颯橫角之嚴更
警部曲之相守仰萬馬而哀鳴哭三軍而回首蕭蕭大
旗靡靡古柳漬血隱夫悲笳淚花寒夫征袖迺異國之
騎人宿傷心之古埃凜不寐而披衣待丁丁之餘漏哀
瑤暉之若練傷永宵之如晝淚琅琅而應聲鬢彫彫而
對酒既回雁而橫參倏鳴雞而墜斗感寒角之清厲獨
慷慨而赳赳當斯時也殘月在牀征馬在廐長劍在腰
柔轡在手戒裝霜涉呼騶星走僕夫倦起行且謠曰辛
苦兮長征清角兮淒聲旅雁噉兮客心驚城烏啼兮天
漢橫視東方兮未明君何爲兮遠行

寒燈賦

暮風方厲朔雪其凝丹靈已匿素魄未升天高銀漢星
低玉繩思美人兮良夜怨玄夕兮一作乎寒燈耿亭亭其
欲滅光熒熒其半明何永宵之晤言乃援毫而賦彤渺
一作夫銀釭之寒夜照羈愁之獨眠酌南油而輝滿然西
漆而光懸鶴頸委其未翔鯨一作鯨鬚舒而尚潛怨虻脂
之明涸傷蘭膏之芳煎謝玉枝之秀華讓荷蓋之澄鮮
託金羊而影續赴霜蛾而晃然若其芳苾常生蓮莖恒
滿臥玉虎而欲飛擁金鳧而不煖動翠帷則生花九枝

解羅衣則銷明兩焰飛蛾繞而照空輕花重而微暗回
 繁之浮炷一作炬虛涼行障一作帳之寒檠欲短丙夜而空
 花亂飛乙帳而淚珠不斷銷膏則華幔漂搖翦心則流
 蘇零亂獨寂歷於空帷隱悁連於閨館迺夫幽娥永巷
 棄妾空房倚花缸而獨坐欹燈影而自傷照流黃而非
 月映擣素而非霜微明昧於瑤寢半徘徊於玉堂怨一作悲
 獨臥於雙花懷君王於九光丹灼灼以流帳青熒熒
 其映牀移玉腕而微挑眩飄花其欲亾然死灰於獸炭
 泛寒碧於羽觴感愁心之脈脈故搖曳而茫茫照兩地
 之相思燼雙炷之不長況乎歧路一身窮途兩淚空焚

更生之藜時逢叔夜之魅通雲絕再築之期絕纓無可
 報之會問棠梨而無人觸老狸而獨寐能無瞻熒影而
 自憐撫青燈而長喟也哉

怨曉月賦

美人二八兮捲珠箔明月三五兮流華閣迴颺動兮玉
 櫳寒素河橫兮露華薄林騷騷而鳥啼沙皚皚而雁落
 懷耿耿兮獨不寐恨盈盈兮將誰託捲翠被而凝妝掩
 蓮帳而清酌玩膏銷兮銀缸蘭燼灰兮瑤筐憐玉腕兮
 相思苦怨愁人兮知夜長何望舒之玄轡流清景而逸
 光乍徘徊而入戶忽朦朧其在梁既宛轉其侵幕復飄

夏節慈全集卷二
三
颯而去牀玉壺寂寞銀箭丁當夢回遠塞淚滿空房萬
里關山之月千家砧杵之霜度七襄之永夜斷九逝之
迴腸望門前之烏柏焚帳底之胡香懸夜光而盈室徂
清夜兮未央逗瑤波而微見淡荒荒其映牆銀河度兮
西山玉斗轉兮雲閒荒雞鳴而尚戢宿鳥翔而復還天
將曙而漠漠夜若歲其漫漫獨寒錦帳靜撫雕闌仰視
月兮髣髴弄清質之潺湲隱簾櫳兮玉鏡隔烟霧兮紅
顏淡參差其欲下蹇蒼茫其未安衰芙蓉兮江上落梧
桐兮井欄忽衆星之零亂獨孤月之幽閒一作宛瑤華
微含而如漾映瓊田而若寒風蕭蕭兮雲漫漫寒烟古兮木

葉乾按瓊笙兮爲誰響抱銀箏兮不忍彈思蕩子兮行
路難念征夫兮衣裳單明月入地兮夜在天夫君悠悠
兮何時還

李雲云古之善言怨者三百篇而後僅見離騷甚矣
怨之難言也存古忠孝性成纏綿懇摯遭時喪亂未
及終賈之年殉身家國若此者可以怨矣吾
讀其賦而悲其遇重其人并以愛其文焉

夜亭度雁賦

旅人寒宿孤雁數聲離魂淒然感陳後主夜
亭度雁之賦爲廣而成篇

歲云暮矣夜何其長歸禽兮日將夕征客兮悲未央哀
極目兮千里愁遠涉兮三湘望古戍而停轡宿寒亭而

解裝雲迷迷兮衰柳烟漠漠兮空桑銀河暖天金波委
霜聽烏啼而戒涕聞猿嘯而沾裳迺蕭騷之北林雁嘹
唳而南翔寒沙無際秋風幾行爾其哀翼連翩商吭清
切緩羽飄搖緒音婉冽振聲兮寒山空墜影兮秋江潔
響失萬重之雲愁飛一片之月落浦則白鷺驚羣渡江
則青規啼血側過如邊角之蕭條遙聞如胡笳之悲徹
一作天潭潭其古今霧濛濛其明滅草披離而芳凋木
蕭騷而翠脫月離之淚雙流戍婦之聲再咽聲飛笛裏
之梅光落沙中之雪惟古隴之征夫與空牀之怨妾抱
焦桐而夜鳴倚銀釭而宵怯寒徘徊兮金柝露彷徨兮

玉除覩征鴻之長去懷戰馬之焉如夜夜玉關之羌笛
年年錦字之鄉書斜度交河而風縮高唳空閨而月虛
冷鐵衣而不臥嘖玉筋而恒啼恨賓鴻之雙落憐孤雁
之獨棲碧玉相思之女黃榆遊冶之兒盡低徊而掩面
或慷慨而沾裾況夫躑躅長途飄流異域瞻古道之悠
悠轉中心而脈脈顧清影而相憐應曼聲而下泣灞亭
射虎而醉歸青海牧羝而夜哭憐故時之將軍弔未歸
之屬國亭尉相呼雁書無策渺浮雲之可託遙江關而
靡極茫茫河一作湖海兮征南邈邈雲山兮向北洞庭之
水千里九疑之雲一色飛飛去兮衡陽浦望帝子兮長

夏管集卷二
太息

紅蓮落故衣賦

余池有蓮秋而憔悴哀而賦之以詩句爲題
用王盧體

歎江國之芳菲鶯花駐其清妍懷風流之在昔接聯翩
之少年春風折柳秋江采蓮柳弄色兮非一蓮相思兮
可憐分澄波之淡淡秀荷葉之田田羅裙蕩漿玉腕移
船麗人宛宛兮既往愁心脈脈兮誰傳爾其容華嫣然
豔陽不再搖露珠而猶圓含月華而如碎一作醉風來明
漢女之瑤雨過滴鮫人之淚一枝則春恨千絲並蒂則

秋波百媚承公子之餘歡託湘君之解珮且以汗泥妙
質烟霧清光紅因宿粉翠欲回香蓮分心苦藕斷絲長
晨餐沆瀣夕沐芬芳綠寒鸚鵡紫亂鴛鴦何涼颼之秋
晚遂零謝於池塘嗚呼菡萏先零芙蓉已暮柔恨未舒
芳情非故星歷歷於銀河秋迢迢兮玉樹紅粉落其晚
一作曉風綠衣驚其墜露同團扇之棄捐希君王之一顧
乃爲歌曰衰柳毵毵兮秋始波美人日暮兮采蓮歌南
湖羅綺兮爲誰多蓮房墜粉兮傷如何

冰池如月賦

用謝宣城句

越朔風之振地水漸漸其腹堅金鑪乍煖翠衾不眠爰

夏會集卷二
問梅而送臘睠徘徊於庭前何小池之明潔恍積素之
一作瓊田非玉壺之晨徹卽冰輪之夜鮮光搖搖而不
動影淡淡而如懸抱明虛受含淨光圓曉避浴淵之日
宵分入水之天方諸廣照飛鏡流妍爾其寒逼疏簾明
虛芳句散餘霞而成綺晃水心而捧劒飄紅葉則落桂
一枝映青樓則影娥半面白雁顧影而欲驚素鷗拳足
而如見鴛鴦宿而對語雙雙翡翠棲而流光片片似迴
雪而疑虛類凝霜而難踐惟水玉之澄華與太陰之霄
練實漾碧而搖青固參差之相眩於斯時也空房棄妾
獨戍行人單衣霜雪半枕風塵明水寒而衣袖薄華月
度而關山深睡鳥烟冷老馬霜侵詠苦寒於長夜懷遲
日於陽春我傷如何勞勞至今嗚呼秀月澄冰迢迢清
泚今古同然悲歡如此三冬幾何春光載起陽鳥集於
江關潛狐聽於波底條風舉而太陽明蕩漾一江之春
水乃爲歌曰冰池如月麗影娟娟東皇微扇春明白妍
堅澤已化靈河在天北風雖勁何日長年

端午賦

爾迺矩持炎帝方司祝融朱明日永麗節天中陳柯械
其蕤露柔條扇其景風綠泛麥秋黃分梅雨涼月隱而
納涼愁霖深而清暑度九夏之逝光忽五日之令序晞

光拂其蕙晚皋陰沐於蒲塘丹李垂實素槿成行泛崇
蘭而欲落聞鳴鳩而不芳雲垂黃鶴之風水變丹魚之
浪語鴛鴦而新調采蟾蜍而相望桃似人形艾皆虎狀
當江南之芳景極榜汰之水嬉彩鷁雷動錦帆雲齊魚
龍駭神靈疑亂汪洋之淶波撥容與之雙槳相逢蓮葉
之西共泛星槎之上吳姬抗腕而御橈越女停雲而振
響啁啾四發欸乃一聲曉泛而露荷如拭晚歸而月柳
微明長洲空苑闔闔古城家家竹枝人人桃葉紅回繫
臂之絲青畱鬪草之襪繞腕則條脫雙鉤泛酒則菖蒲
九節屯兵革之閔酷邁鄉關之亂離愁中風俗夢裏歲
時寂寞鄴中之贈髣髴江州之儀地臘誰傳方舟不渡
今年之朱索空纏去歲之赤符已破蘭非可浴之湯艾
無可懸之戶蕭條佳節慘淡餘生盤中角黍杯底臯羹
縷非續命繒誰厭兵興懷抱石之貞未遂投江之孝感
慨烏鳶之歌反覆龍蛇之調家國煩冤形神相弔嗚呼
三廢有恨百贖何身雖年年而祭屈或處處而祠陳魂
歸來兮未定哀江南兮幾人

騷

九哀

曜靈

夏節思全集 卷二
十一
曜靈落兮蒼梧浮雲沒兮瀟湘波帝子屈兮玉鸞徂芙蓉萎兮秋水多南翹首兮重華九疑縣連兮路遐靈偃蹇兮亭亭薜荔旗兮蕙旌雨瀾瀾兮山青波潺湲兮澗鳴三秀折兮公子來秋草綠兮王孫歸佩珊珊兮來遲露瀼瀼兮未晞左青瑤兮右素威羞玉芝兮療飢左右盼兮光遺青霜激兮陽景微睠瑤琴兮般淫裔哀弦急兮淚沾衣

思羣公

玄雲流兮閶闔開龍車駕兮神往一作夜來靈焱發兮蕩九垓緒颺橫兮相徘徊索瓊漿兮進玉醴蕙肴陳兮蘭

席啟神悅悅兮栗子體左徐侯兮右吳黃震天鼓兮揚爍苾止桂旌一作旗兮登玉堂前後睠兮軼曼光鞭飛廉兮御豐隆叩天門兮道蒼龍日旦兮月融融三江遠兮木葉落思羣公兮悲風作巫咸進兮筵尊告空山靜兮深鬼哭

南浦

桂楫兮蒙衝鱗鱗兮海東錦帆兮張風綺綢兮凌空超天河兮銀漢通光迢迢兮渤澥窮谷水兮秋始波黠沛兮馳虛無橫海兮伏波百神森兮星羅焱回回兮靈徂鸞譽譽兮神過南浦泛兮帆檣集長劔一作弓斷兮寶刀

澀天策隱兮旄頭急玉冕裂兮錦裘失胡笳動兮樓船
敗從魚龍兮沈江海雷師訇磕兮雨師灑軼無形兮排
玄靄乘輕烟兮激雲水翳窈窕兮哀山鬼

結玉芝

擗木蘭兮芳洲結玉芝兮瑤圃睠四顧兮徘徊余何爲
兮荼苦芙蓉萎兮西江蘼蕪衰兮南浦森岌岌兮高冠
佩陸離兮朱組橫四海兮皆狂斯披兮斯左歡醜
兮揚波余不忍兮改此度哀靈修之已化兮慨皇輿以
跼步鷓鴣鳴兮鳳衰歸丹山兮鍛羽捐余玦於澗濱兮
投余環兮江澣紛總總兮陸翺路漫漫兮修阻望故鄉
兮蔓然羞瓊糝兮上下

雲中遊

秋颿動兮玉梁芳草萎兮河陽綠滋謝兮變黃朱華凋
兮負霜彼衆鳥兮安翔獨孤鳳兮遑遑寥沆天高兮愴
恨澹偃蹇兮懷上皇哀美人兮旣亾彼蚩蚩一作尤兮爲
朋以冉冉其遲暮兮寧信修之可忘結三秀兮寒芳怨
景暉兮逸光鸞啾啾兮爲從驂離離兮飛龍佩瓊枝兮
訪有娥奈蹇修兮未我通君王去兮遊雲中懷膏沐兮
誰爲容雖鳩媒之善辭兮羌余心之未同

臨清流

夏節思全集 卷二
桂楫兮迎瀾葯房兮內寒泛輝兮崇蘭沐照兮輕紈期
美人兮江干奏清徵兮玉闌清霜一作霞發兮裳衣單懷
脈脈兮寡歡美人未至兮露溥蔓草平兮漫漫蕪城暮
兮長歎狄冥冥兮空山葦蕭蕭兮哀湍萍何爲兮崖際
鶴何爲兮林閒臨清流兮濯冠愁日暮兮潺湲

秋士悲

虎豹兮踞天門掩朱明兮景淪橫千里兮氤氳城闕兮
蔓草野郭兮青燐秋卉凋兮傷心秋陽匿兮愁霖瓊戶
玉閣兮爲薪珠簾翠棟兮爲塵蛾眉曼睩兮黃土綺心
蕙質兮平莽噫吁噉兮哀以楚秋士悲兮弔今古望靈
均兮南浦楓湛湛兮江水多哀江上兮光景徂日曼光
兮流層波

王孫

三江波兮木葉脫孤雁噉噉兮起天末秋氣高兮肅清
激流霜一作霜花兮哀越楚歌終兮吳歛闋吹玉笙兮臥明
月援瓊枝兮偃蹇佩瑤草兮百結乘余馬兮駕余車鸞
啾啾兮爲我驅哀王孫兮歎路隅朱門閉兮狐鼠居生
烟漠漠兮當玉除天陰陰兮新鬼趨石馬呼風兮猿嘯
雨日月匿光兮神靈語余將排闥闔兮入帝所告天一作
王皇兮玄之圃左玄螭兮右蒼虎射旄頭兮於北街乎

夏節愍全集卷三
飲羽無使王孫兮久荼苦

望首陽

寥廓兮秋天肅而氣高搖落兮草木變黃於亭皋長玄
夜兮晦晦思朱陽兮昭昭天淫淫兮降霖大塊動兮秋
潦朱華零兮冒平阪但聞訇磕兮懸洪濤三江壯兮滔
滔魚龍舞兮神靈號金支翠旗兮馮夷朝黃鵠之羽離
離兮而尾脩脩登高林兮泛巢雲茫茫兮浮天失地而
寥遙召豐隆兮招玄冥驪龍首兮凌扶搖叩英皇兮訪
有姚溘靈颺兮不可招東望首陽兮有蕨復有薇玄馬
黃兮僕苦飢橫絕四海兮將何依

二卷

夏節愍全集卷三

青浦王述庵先生鑒定

婁縣莊師洛純川輯

受業

陳均秉衡
何其偉韋人編

五言古詩

擬古

春風動衣袂榮露含綠滋十日不啟關蔓草生階墀行
行馬蹄疾去去車輪遲疾者日以遠車牽苦不脂遲遲
復遲遲浮雲無還時南枝越鳥鳴慰我長相思

雜感二首

陽暉遲以永細草知春發彷徨悲無依仰視浮雲沒凝

睇忽有遺所思在天末遠道勞夢思素書通契闊欲往
從南風路遠山川越春仲以爲期芳樹綠滋歇日暮人
未來瓊枝慰飢渴
端居戚不歡階草綠堪采夜起瞻天樞春仲玉衡改河
清安可期冉冉將誰待天高山鬼哀窈窕攀芳蒞月明
風蕭蕭披襟思慷慨恨無雙飛翼飄颻凌滄海振衣登
蓬萊餌芝壽千載

李都尉從軍

置酒登河梁握手與君辭征人涉長道何時復來歸且
復立綢繆斯須固何爲浮雲西北馳去來自有時晨風
不可託仰視令人悲

班婕妤詠扇

我有齊紈扇皎皎機中紵動搖發微涼明月掩清露彩
色固不移君心有新故哀颺一夕來歷歷凋華樹中途
恐棄捐敢保長相顧

魏文帝游宴

秉燭良夜游冠蓋集曲墀金塘宿靈禽佳木垂華滋明
月流中天碧雲自相隨芙蓉映清波日暮涼風吹嘉賓
難再會清讌寧有期羽觴飛雜沓纓纓紛參差人生會
行樂不醉慎無歸悠悠飛梁陰載筆陳綺辭逍遙放志

意令我忘神疲

陳思王贈友

名山產美璧大澤生明珠君王開天紘網羅多英儒言
從冰井游臨風振長裾繁星映連薄華月懸清渠翱翔
登華輦日暮升玉除念子在末位懷寶徒踟躕慎無生
百憂明德抱璠璣惜哉延陵子寶劍遺邱墟亮節久愈
宣親交義豈渝

劉文學感遇

離離山下草浥浥葉中露豐草嘉露滋油油曜行路小
臣頑魯質元后謬一顧廁身西掖垣勗哉慎無過明鏡
流炎輝圓景入緹幕載筆廣殿陰華棖蔭列座昭昭雲
漢章爝火何以助

王侍中懷德

漢道闇不章豺虎屯西京委身別故國行旅滯南荆親
戚不敢問征馬相向鳴白骨生荒烟野蒿隱孤城但見
狐與烏翔風多悲聲回首灞陵岸傷哉客子情幸有賢
主人纓服縹華纓耿耿九淵下復見日月明四座振徽
音度曲淒以清人生非金石奄忽若舜英明德何巍巍
愧我素餐誠願君綏福履億年垂令名

古離別

去去復遲遲遠道渺難卽白日破皋野懷我萬里客風塵非昔顏會面安可識芳草忽變衰奄忽零露積浮雲還無時蕩子歸無期棄捐守空牀景光逝如馳瓊樹不可攀何以慰渴飢

夜宿山館

炎暉熙自南凱風豫以款水仙未成調廣陵已絕散明月入幽林朱霞冒平阪碧澗疑烟浮翠嶺入雲斷一作翠雲言彈邱中琴獨倚山阿館淒淒楚歌急悠悠越吟緩所以立夜游清酌不能滿

六哀

徐冢宰

石麒麟明史彙列傳徐石麒麟字寶摩嘉

忠賢削籍崇禎三年進士授工部主事許魏
功郎中歷尚寶卿應天府丞十餘年始入為
左通政累遷光祿卿通政使擢刑部右侍郎
旋進左陳新甲下獄大學士周延儒以下多
救之石麒麟持之堅卒論死時有清獄之詔石
麒麟先上情法不合者數十人姜採免尊擢
本部尚書都御史劉宗周以救姜採開元
獲嚴譴石麒麟疏雷不納塚開元既下詔獄移
刑部定罪石麒麟擬開元贖徒塚謫戍帝怒石
麒麟落職福王監國召拜右都御史改吏部尚
書奏陳省庶官慎破格行久任重名器嚴起
廢明保舉交堂廉七事褒納之御史黃耳鼎
給事中陸朗有物議石麒麟發朗通內之罪朗
奄人內傳雷用石麒麟憤發朗通內之罪朗
疏詆石麒麟耳鼎亦兩疏劾石麒麟一言嘗劾吳
昌時代為報復一言枉殺陳新甲致敗款局
石麒麟益憤歷敘昔年和議始末及新甲欺罔
隱情因力請罷斥卒引去明年南都石麒麟

夏節忠全集 卷三
移居城外城將破石麒麟曰吾大臣也城亾與
亾豈宜苟活復入城以閏六月二十六日朝
服自縊死

忠襄老成人夙昔抱明哲秉鈞右天子貞簡懋嘉節倉
海副車空平陵鼓聲絕五朝有遺則景光亘千葉遺恨

楚社虛 仇竟誰雪高山流清音一往風益烈

侯納言

峒會 嘉定縣志侯峒會字豫瞻一字廣成天啟乙丑進士初任南銓與徐石

麒陳洪謚號南部三清以參議督學江西疏陳學政便宜十事銳意整飭嘗黜益宗生二人益藩怒峒會抗言學臣祇奉朝廷令甲餘非所知也遷廣東副使未起起浙江右參政分守嘉湖漕卒擊傷秀水令李向中峒會捕戮首惡部內肅然擢順天府丞未赴而京師陷福王時用為左通政辭不就順治乙酉六月大兵徇地至嘉定峒會與進士黃淳耀

等率鄉兵守城七月四日大雨如注守陴者不成列城遂破峒會趨歸辭先祠從容賦詩自沈於家之葉池 案廣成先生有納言集

忠烈簡邁姿淡然青雲志三鳳齊雝鳴翮羽拂雲際孤
城戰苦時日落鼓聲死始知朝陽禽亦復秋颿厲六翮
鍛不垂靈風滿天地興懷募義旅言灑西州淚

黃鎮南

蜚 楊陸榮殷頑錄黃蜚字文麓南昌人本姓涂少隨其舅黃龍鎮遼陽龍死

無子蜚襲蔭遂冒母姓積官後軍都督大兵南下諸將皆迎降不降者惟蜚與黃得功而已得功死後蜚孤軍駐池太閒未知所向聞帥鄭芝龍貽書於蜚約發兵下江南蜚大喜按兵江口抵蘇州而芝龍兵不出遂與吳志葵結營湖御間大兵下松江蜚將航海我兵襲之會水舟膠蜚先取妻子投水中乃自沈我師鉤致之斷其左右手而後戮之

鎮南三萬師家世遼西將秋風捲大旗落日滿牙帳五
湖駕朦朧吞波偃風浪大功一戰摧弧矢天 壯將星
落南浦夜半旄頭抗衰草白茫茫風雨肅遺像

吳都督

志葵 金山縣志吳志葵字昇階召卷
人少負奇氣與羣兒戲輒自稱將軍為
隊伍頗有法贅於陳陳氏世業賈多秦晉遊
俠之客彎弓說劍投石超距與志葵相得甚
歡學穰苴孫吳兵法中崇禎癸酉武舉會試
不第嘗謁前門關廟舉青龍偃月刀舞於衛
觀者如堵由是名動京師東陽張國維巡撫
江南委署金山營把總乙亥二月流寇犯安
慶以標兵五千人為前鋒身被重創中四矢
潰圍力戰擒賊家口奪其騎而回累官坐營
遊擊將軍以防禦功拜左軍都督僉事充總
兵官鎮守吳淞頗著威信晉都督同知 大
兵南下敗績被擒戮於南
京宣仁橋妻范氏自殺

威虜負奇氣膂力恣輕矯持重吝一發謀斷苦不早蛟

龍失大澤千里帆檣倒復楚計不就寶劍埋荒草義士

五百人同死田橫島雲一作靈 旗破一作被 長風恍惚神靈

藐

魯副鎮

之瑛 徐秉義明末忠烈紀實魯之瑛
字瑟若世襲蘇州衛百戶累官劉河參
將南都建號防禦京口遷副總兵駐師福山
大兵至蘇州鄉兵四起諸生陸世鑰聚眾
千餘屯陳湖中有十將官者亦屯千餘人於
左近已而所部有被獲下獄者陳湖之師伏
力士劫之焚城樓城中士民應之焚撫按公
署按亦斂兵於南園之瑛率千人入城與
大兵戰眾潰不能支之瑛率
死有義士韋志斌者亦同殉

瑟若輕健姿一往仗奇氣寶劍酬君恩深入無退志孤

軍矢一戰光響橫振厲慷慨受命時白虹貫吳市猛虎
困樊籠長嘯驚颯利要離千古愁浮雲渺無際

先考功

明末忠烈紀實夏允彝字彝仲號瑗公松江華亭人崇禎丁丑進士授長樂知縣五年邑大治將舉卓異會丁母憂歸江南建國擢考功主事守制不赴乙酉八月大兵遣安撫官入郡郡人出謁允彝避之於野上書請存亾社以為三恪嘉定侯峒曾死節允彝經紀其喪歸即欲死其兄之旭諷以方外允彝曰是多方以求活耳當事以人望所歸必欲見之曰進退惟其意但求一見有何不可乎允彝曰警有貞婦或欲嫁之婦不可則語之曰爾即勿從姑出其面婦將奉帷以出乎抑以死自蔽乎乃作絕命詞曰少受父訓長荷國恩以身殉國無媿忠貞南都既覆猶望中興中興望杳何忍長存卓哉吾友虞求廣成勿齋繩如怒人蘊生願言從之握手九京人誰無死不泯者心修身俟命敬勵後

人九月自沈於松塘口浮水面衣帶不濡所著有禹貢合注而幸存錄為絕筆贈左春坊左庶子諡文忠

嗚呼先文忠橫劍誓河曲周旋帷幄閒指揮百靈伏天
時帳下三千哭從容蹈東海景耀長回燭九京
有同心天門策龍足閔子熒獨人哀哉集茶蓼

六君詠

史太師

可法 明史彙列傳史可法字憲之大興人崇禎元年進士歷官南京兵部尚書十七年四月北都陷鳳陽總督馬士英迎福王監國拜可法禮部尚書兼東閣大學士仍掌兵部事士英擁兵入覲可法以勢不兩立請督師淮揚加太子太保改兵部尚書武英殿大學士議分廬鳳淮揚為四鎮以黃得功劉良佐劉澤清高傑為之可法開府揚州

開禮賢館招四方才智下僚有才被棄者悉
舉用之盧渭等皆與幕府大清睿親王齋
書致可法可法旋遣人報書語多不屈順治
二年二月大兵取山東河北將逼淮南客
請移泗州防護祖陵會左良玉稱兵犯闕王
手書召可法入援即日發兵渡江良玉已為
得功所敗乃還四月十八日大兵逼揚州
城下諸文武分陴拒守越二日大兵用巨
砲擊城西北隅毀二十五日城破可法自刎
不死一裨將擁出小東門被執可法曰我史
督師也可速殺我勸
之降不從遂被殺

忠清卓犖姿夙昔事戎馬隆望震華夷嘉名澤風雅金
臺涕泗中發憤復楚社出師計不就戰死維揚野西風
五丈原冥冥雲龍駕盈盈陰雨時時見神靈下

黃少保 道周 明史列傳黃道周字幼平漳浦人天啟二年進士改庶吉士授編修崇

禎二年進右中允因三疏救故相錢龍錫降
調瀕行上疏語刺大學士周延儒溫體仁帝
益不懌斥為民九年用薦召復故官旋進右
諭德疏辭因言已有三罪四恥七不如其一
則謂文章得意氣不如錢謙益鄭鄮方被杖
母大詬帝帝得疏責以顛倒是非道周疏辨復
營護鄭帝怒嚴旨切責而刑部主事張若麟
復劾之於是貶道周六秩為江西按察使照
磨久之江西巡撫解學龍薦所部官推獎道
周備至大學士魏照乘惡道周甚擬旨責學
龍濫薦帝遂發怒立削二人籍逮下刑部獄
並杖八十戍廣西周延儒再相欲參用公議
與蔣德璟吳性共稱乃復故官請假許之福
王監國用道周吏部左侍郎入朝拜禮部尚
書遣祭告禹陵甫竣事南部叵唐王聿鍵以
道周為武英殿大學士與鄭芝龍不合乃請
自往江西圖恢復以七月啟行所至響應得
義旅九千餘人由廣信出衢州十二月進至
婺源源遇大清兵戰敗被執至江寧臨刑過
東華門曰此與高皇帝陵寢近可死矣監刑

者從之

漳浦介以廉自負韜鈴術風流映古今遺世真獨立戎馬非所長振羽入羅罽言從孤竹風慷慨誓絕粒雖不成報國心已畢靈旗縹緲閒陰飆斬衛律

劉亞相

宗周人萬歷二十九年進士崇禎元年召為

順天府尹居一載謝病歸八年七月內閣缺人命吏部推在籍者以宗周名上詔所司敦趨宗周固辭不許明年正月入都授工部左侍郎帝欲大用溫體仁患之上章力詆遂斥為民十四年九月吏部缺左侍郎帝謂劉宗周清正敢言可用也遂以命之明年八月擢左都御史十月京師被兵請旌死事盧象昇而追戮誤國奸臣楊嗣昌逮跋扈悍將左良玉防關以備反政防路以備偷渡防通津臨德以備南下帝不能盡行時姜採熊開元以

言事下詔獄宗周約九卿共救帝大怒革職為民福王監國起故官馬士英薦阮大鍼知兵有詔冠帶陛見宗周曰大鍼進退係江左與公老臣不敢不一爭之疏入不聽遂告歸明年五月南都公宗周不食卒學者稱念臺先生

劉公執法臣威儀世所則弟子三千人紹興鄒魯跡朝野四十年講壇日翼翼一死存大常道宗傳入室周粟義不餐何況非劉石遺恨歸河山流風邈難卽

徐詹事

汧蘇州府志徐汧字九一長洲人長

昌被逮皆汧與同里楊廷樞斂財經理之崇禎元年成進士改庶吉士授檢討中允黃道周以救錢龍錫貶官倪元璐請以已代謫帝不允汧上疏言道周元璐賢且請自罷黜亦不聽遂乞假歸還朝遷右庶子尋復家居久之京師陷福王召為少詹事既就職陳時政

七事而安遠侯柳祚昌攻之謂汧自恃東林
巨魁與復社楊廷樞顧杲狼狽相倚汧移疾
歸明年南京失守投虎邱新塘橋下死魯
王監國贈太子太保禮部尚書諡文靖

文靖黼黻才華國懋述作世稱馬與徐遵道適華朴要
離墓草青勝事空寂寞千載有遺風慨然排冥漠始知
風雅儒大勇甘溝壑靈旗動虛無清暉宛如昨

金司馬

聲 明史彙列傳金聲字正希休寧人
崇禎元年進士授庶吉士明年十一月

大清兵逼都城聲具疏言臣所知申甫有
將才願仗天子威靈為國家捍強敵帝納聲
言超擢副總兵改聲御史參其軍亾何甫連
敗陣亾遂屢疏乞歸鄉郡多盜聲團練義勇
為捍禦十六年冬廷臣交薦即命召用未赴
而京師陷福王立超擢聲左僉都御史不起
大兵破南京聲以閏六月懸高皇帝像率
士民拜哭糾集義勇保績溪黃山分兵扼六

嶺遣使通表唐王授聲右都御史兼兵部右
侍郎總督諸道軍拔旌德寧國諸縣九月敵
故御史黃澍降於大清 王師間道襲破
之聲被執至江寧語門人江天一曰子有老
母不可死對曰天一同公起
兵可不同公殉義乎遂偕死

司馬盛意氣豪舉不可親翩翩雲中龍渺忽誰能馴牙
旗風蕭蕭慟哭驚鬼神輕生貴任俠英爽殊逼人功名
盡一劔壯志苦不伸縱橫一世閒卓犖誰比倫

郝中丞

彪佳 明史列傳郝彪佳字弘吉山陰
人天啟二年進士授興化府推官外艱

歸崇禎四年起御史上合籌天下全局疏復
陳民間四大苦帝善其言出按蘇松諸府
等以侍養歸北都變聞謁福王於南京遷大
理寺丞旋擢右僉都御史巡撫江南高傑駐
瓜洲跋扈甚彪佳勉以忠義共獎王室傑感
歎曰如公傑甘為死羣小疾彪佳彪佳竟移

夏節終全集 卷三
疾去南都失守杭州繼
失彪佳端坐池中而死

中丞多風姿簡貴出塵表修飾好羽儀凌雲獨矯矯方
圓表裏閒立朝氣清沓曹娥千載流忠孝頗同調瞻言
從彭咸乘風駕縹緲先人在九原頗憶當時好

送別

馬秣車已脂借問君何之青青山陰柳是君下馬時我
有雙玉環宛潤好顏色佩君衷裏衣明我長相憶置酒
臨江皋贈君以敝裘敝裘不為薄願君思同仇日落星
爭光行人不知處前山馬首迴掩涕獨歸去

做古

月出西南樓流光入幽室盈盈十五女綽約好顏色素
手響金徽一彈三太息激楚變清商悲惋難自抑本以
待遠人所遇非疇昔薰風蕩羅帷臥懷行旅客夢中迷
遠道誰能辨南北飛禽習習還疑是君行跡征雲無歸
期徬徨淚盈臆

贈廣武申大孚孟

緄輔通志申涵光字鳧盟永
年人佳允長子博學能文尤

長於詩弱冠名噪三輔甲申聞父殉難慟不
欲生遂絕意仕進日事詩文晚年名益重與
殷岳張葢稱緄南三子有文集四
卷聰山詩八卷及荆園小隱等書

君家漳水邊意氣冠河朔英爽殊不倫酒酣高歌作易
水白日寒千秋事蕭索慷慨希古人璠璵隱藜藿棄家

入江千裘馬盛揮霍天紀闇不章棲棲靡有託行行東
南征舒此伯王略出門成侯王閉戶死溝壑覩茲乘風
便始信無家樂

春雪懷不識

嘉善縣志錢默字不識梅仲子八
九歲能為詩文崇禎癸未進士知

嘉定縣有強項聲聞劉河籍役賦功民用不
擾南都失守棄官歸及父罹難削髮入黃山
名成回號霜華道人卒葬
雲門顯聖寺有吹簫草

悲風起天末雨雪淒以寒重裘不知溫無乃衣裳單重
幃不知煖無乃行路難卒歲守藜藿短褐苦不完儒冠
人所棄況余生綺紉高才世所疾況汝懷璵璠昔也賓
客滿絲竹起君歡今也身熒熒雞鳴斗闌干盛衰良有
時不識蛟龍蟠中夜倚鳴鋏能無達人歎

古詩

漢女婉變姿樹蘭紉為佩芬芳希娛人入宮反見罪出
門無同心深言徒自悔冉冉遲暮憂殷殷忽如醉疏者
日以親賤者日以貴菘菹蔓依人幽草自憔悴

敘懷

曰余廓落委逍遙忘所務願從濮上游敢望隆中顧高
蹈山阿人荷衣守遲暮蘭蕙明曲阪苔蘚冒幽路丹霞
照深池清暉被嘉樹服食希神仙誦讀羞章句黃金竟
不成朱顏為所誤言念往者來始信新人故

望家園作

案宋徵璧抱真堂集詩注甲申三月國變瑗公即構數椽於崑山足跡不入城市家園即指此

流觀窮四野草木蕩綠滋漠漠崑山陽浮雲來閒之一
葦不可杭白雲空相思落霞依故山落葉依故枝無知
尚思歸何以慰有知

五子詩

喪亂之餘親朋凋謝平生風誼道兼師友者五
人焉短歌擊節髣髴若人揮淚山河流連繫之
矣

邵景說

梅芬邵麟霏玉公傳叔祖霏玉公諱
莓芬字景說金山衛學諸生福王時以

選貢入太學公年未弱冠即以文受知郡守
方公時海上王珩右先生方興幾社公與同
郡李舒章陳臥子夏彝仲周勒甫顧偉南張
子服徐闇公李存我素心宋轅文尚木子建
相為應和一時得七十二人鼎革後諸公或
殉國難或遁海濱間亦有入仕興朝臘至
顯職者公家居杜門堅臥不
出以病卒著鳳輝堂詩稿

邵生自簡貴風期秀彌矯寡欲棄塵物幽棲抗雲表遺
世蜀巖隱亮才楚龔天髣髴懷若人賞心可同調

陸鯤庭

培明末忠烈紀實陸培字鯤庭仁和
人崇禎庚辰進士授行人歸而讀書甲
申九月補原官十月副吏科熊汝霖祭奠淮
藩大兵至浙培避橫山之桐廬嶺過其友
陳廷會語以國祚如此惟當一死以謝君親
長號而別在橫山其妻知其欲死防之嚴培
乃給妻脫身歸故居捷戶自縊家人破壁救
之甦培患曰奈何苦我即作絕命詩再拜其

二僕以繩授之日使我得成其志者汝等之惠也登牀就縊從容而死年二十九

舍人餐霞姿冰稜簡遐質徘徊通蔽閒懷照識微密淵
玄既鳳舉神檢白玉立亮節終不渝榮色自此畢

侯文中

玄洵 案文中嘉定諸生節愍姊婿早世陳黃門輓侯文中詩自注云文中為余友雍瞻子風儀整秀規簡貞合

文中素凝神含光映四表達生希豹隱韜精振鸞嘯棄
魄知逝仙返魂始探道淪跡已十年奄忽名愈曜

錢漱廣

熙 嘉興府志錢熙字漱廣嘉善人中丞士晉孫沈靜簡默不尚芬華父梅性豪逸絲竹滿堂熙焚香縱帙如無所覩聞其詩歌刻意漢魏初盛唐孝廉徐彬臣歎為洗馬當年

長公湖海人蘊真任獨往規檢既高步機神復中朗瑩
情從所忘資神匪虛賞悽惻萬里心慷慨五湖長

周上蓮

錫 闕氏成仁錄余友周子秋駕幼時與華亭夏存古交好其尊人斗垣先生嘗佐存古之父文忠公允彝為宰長樂秋駕師文忠而友存古為學甚勤存古撰代乳集時年止九齡才華颯發而秋駕亦以髫髻能文章為文忠所器重以薦於陳黃門臥子臥子司理浙東攝府象比試諸生則以秋駕為蕭山士冠案周上蓮疑即此人

孝廉善循默邱壑資神理吐論洽雅宗遺情軌風始希
照素履貞靜觀守玄美夢寐擬平生神期竟誰嗣

懷母詩二首

自注家慈棄家入道子經亂漂泊賦此

歸昌失其雄挾此孤鳳雛青鳥翩然來同上增城阿渴

飲瑤池泉飢餐玉山禾孤雛巢枯桐朝夕憂斧柯西顧
千萬里欲往道路多枯桐化荆棘哀鳴當奈一作何
中庭有玄鶴絕吭長悲鳴浮雲爲徘徊悲風淒以清一
朝入嵩山餐霞弄石英翱翔羽客閒九轉得長生遺雛
在樊籠宛轉多商聲六翩猶未修何以萬里征言念靈
鳥質傷我勞人情

東荆隱女兄

天倉州志夏淑吉字美南華亭夏允彝女能詩適嘉定侯岐曾仲子洵年二十一而寡生子榮甫周歲而岐曾峒會及子演潔俱以守城死允彝亦自沈吳淞江之紫隄兩家第宅皆灰燼改名荆隱結廬曹溪龍江間兩家奔命賴以棲止演妻姚氏潔妻龔氏咸來從居所謂東園歲寒亭也已而岐曾復以株連被逮死母龔氏赴水死淑

吉夜騰舟潛往棺斂兼以庶姑劉氏屍昇置祖塋旁隨遣人閒行求舅屍於松江又奉姑金氏守節三十年卒初峒曾季子澗亡命有司名捕之洵弟泓挺身以代其妻孫氏死於上海淑吉稱貸營救抱其子榮撫之事稍平榮又才而天淑吉曰吾數年來三百六十骨節交付太空更無繫戀矣截髮爲尼名神一有龍隱齋詩集

余也寡兄弟獨有賢女兄周旋襁褓閒恩勤靡與京殆
將罔極齊豈止手足情耿耿黃鵠哀君子徒生平空房
淚如縷瞻言撫孤嬰敦此舅甥誼何必姬與嬴今余十
六載 紛縱橫烽烟隱蔓草不見雲間城相去一葦
遙無由託衷誠汝也奉慈母真詮炳幽貞五難脫塵網
一視齊死生行見大道成翱翔歸太清

附錄冒丹書婦人集補女冠龍隱姓夏氏華亭人也
常因六姊孫儼蕭沒於丁亥家難為賦一詩云憶昔
于歸紈綺叢郎家聲譽擅江東肅雍自叶房中樂散
朗仍歸林下風日煖畫樓彤管麗春深珠箔麝蘭通
綵雲散後空憑弔野哭荒郊恨幾重又聞思一律云
碧天明月影遲遲翠袖輕寒香露滋海內風塵勞客
夢江東羅綺擅文辭頻驚桂棹迴前渚時整花綰立
小墀子夜明燈猶未寢魚箋珍玩感婚詩詩句清綺
豈特君家大哀一賦獨擅才子耶

自歎

功名不可成忠義敢自廢烈士貴殉名達人任遺世自
愧湖海人卓犖青雲志雖無英雄姿自與儔伍異美人
來何遲景光日云逝誰不誓捐軀殺身良不易百年在
一旦神仙安可冀榮名復何為寂寞千古事

秋懷六首

祝融避炎陸金天肅秋駕玄蟬響高樹鷓鴣鳴深榭豐
草承露凋朱華冒風謝一作朱華承露蟋蟀變一作東
榮素河轉西野自愧蒲柳姿奄忽從物化久視多所悲
疇能竟長夜

涼風何瑟瑟吹我遊子顏歷歷江上林流蟬鳴其閒浮
雲西南征一去何時還駕舟凌洪波杖策窮崇山君子
不遑息小人豫以閒感激在溝壑敢念一作怨徒旅艱中
夜起百憂勞人獨長歎

秋色從西來風物自淒緊金飆辭炎暉玉露戒商一作霜

軫鷓鴣薄暮鳴幽蘭望秋隕零落在一時榮華若朝菌
高從巢父棲下與壺公飲靜觀百歲間無名以為準
新月鑒我帷頽陽八人衣夕霞自相逐暮禽參差歸芙
蓉舒芳渠髮鬢含綠滋盛時不及采秋霜來悴之榮名
固有期恨非少壯時獨行道路長遠行恆苦飢言登西
山趾餐彼蕨與薇

耿耿秋夜光雲中靚靈匹漢陰無報章河陽有棄輓霧
裾結雲環一作髮瓊佩何歷歷佳期匪綺節妙會乃涼夕
微露鮮玉枝輕颯動雕翼餘光歛欲馳流景逝已迫黃
姑九秋期婺女三光隔髮鬢靈駕迴參差空夜織

愁人不能寐羅帳含月光涼風吹芙蓉習習生金塘絡
緯鳴參差瓊露凝玄霜柔條日以勁瑤草不復芳盛衰
各有時憂來浩無方玄髮忽改白使我身世忘

魏坤云存古秋懷諸作
非謝非韓游衍自得

精衛

北一作惠風蕩天地一作芳樹有鳥鳴空中一作林志長羽
翼短銜石隨浮沈崇山日以高滄海日以深愧非補天
匹一本作既延頸振哀音辛苦徒自力慷慨誰為心一本
此處有惜哉志不伸
道遠固難任二句
沈德潛云此淵
明詠荆軻作也

夏節愍全集卷三

夏節愍全集卷四

青浦王述庵先生鑒定

婁縣莊師洛純川輯

受業 陳均秉衡 何其偉 韋人編

七言古詩

青樓篇與漱廣同賦

案漱廣注 見卷三

長安大道平如組青娥紅粉嬌歌舞南北紅樓幾院開
行人爭誦平康譜明鏡春風典鷓鴣金籠夜月嬌鸚鵡
天涯遊子憺忘歸畫船處處生簫鼓有時玉闕朝諸侯
有時金門徵羣流踏青駿馬驕春陌滿地楊花拂御溝
醒來錦袖飄 一作探 歌院醉後紅牙唱酒樓少婦親陪青

玉案貴人盡脫紫貂裘
燕趙美人顏如玉
兩行珠翠嬌
紅燭翠管銀箏太液詞
鈿蟬金雁邯鄲曲
綺帳初回倚
碧鈎瑤琴欲撫吹
金粟宛轉橫
敲碧玉釵
娉婷卻買明珠斛
神宗垂拱放官衙
南臺北里七香車
鳳凰對策呼名妓
獬豸彈冠擁狹斜
王孫夜夜珠簾坐
公子家家玉樹花
樓頭檀板憐青綺
巷裏銀燈拂絳紗
三吳年少多遊冶
筵前戲抱當壚者
金錢夜解石榴裙
丹鬢朝翦桃花馬
風動雙環翡翠牀
霜封一片鴛鴦瓦
對月還疑蘇小來
撫琴偏似文君寡
二十年來事已非
不開畫閣瑣芳菲
那堪兩院無人到
獨對三春有燕飛
風簷一作不

動新歌扇露井橫
飄舊舞衣花草朱門空
後閣琵琶青冢恨
明妃獨有青樓舊
相識蛾眉零落頭
新白夢斷何年行
雨蹤情深一調留
雲跡院本傷心正
德詞樂府銷魂教
坊籍爲唱當時烏
夜啼青衫淚滿江南客

附錄余懷板橋雜記李香年十三俠而慧尤工琵琶與雪苑侯朝宗善聞兒阮大鍼欲納交於朝宗香力諫止朝宗去後有故開府田仰以重金邀致香香辭曰妾不敢負侯公子也卒不往大鍼恨朝宗羅致欲殺之朝宗逃而免雲間才子夏靈首作青樓篇寄武塘錢漱廣云云

楊柳怨和錢大揖石

東風初度春江曲
大隄花草參差綠
昨宵烟雨盡傷心
今日鶯花空滿目
有客扁舟迴自傷
一江春水半垂楊

夏管馬全集 卷四
始知啼鳥皆牽恨不是征人亦斷腸千條深鎖垂芳甸
絲絲盡拂行人面曉氣疑籠汴水隄春光不散靈和殿
猶想當年全盛時江南芳景駐遊絲踏青寶馬香車疾
載酒樓船畫槳遲公子金鞭競相送五街七市遊塵動
爭看飛絮蕩春風卻惹落花迷曉夢到今羅綺古揚州
不辨秦灰十二樓枯柳不知亾國事乘春偏發大江頭
江南江北愁如帶畫船簫鼓一作管知何在鴉鵲渡頭微
雨來琵琶馬上蒼烟外斜陽深處草鱗鱗作客孤帆送
遠人折盡南枝畱去馬迴看北雁滿離津當日豔陽今
在否獨酌春塘一杯酒關情鶯囀章臺路離恨烏啼白

門柳偏逐輕風上下狂銜來春燕滿空梁酒杯千古思
陶令腰帶三圍恨沈郎大道如掌春陽靜臨流直掛垂
鞭影黃鸝夜雨太液池白馬春泥景陽井橫笛城頭不
忍聽那堪柳色更青青可憐脈脈傷情路最是勞勞贈
一作送別亭昨夜春江淨如洗幾片楊花落揚子惟有鍾
山松柏枝春陰憔悴爲君死

過橫雲山

東郊桃李飛如雪春風蕩漾江花發翠閣紅樓水一方
黃鸝紫燕春三月猶想烟花昔日遊誰知羅綺今年歇
披衣露下月欲斜腸斷枝頭杜鵑血

送人還具區

縹緲峯前東風入萬頃蒼波芳草濕一片征帆遠入雲
春水茫茫春月出黃鸝紫燕參差飛生烟漠漠柳依依
三月風光腸欲斷行人何處不思歸洞庭歸客傷心路
桂楫蘭舟愁日暮碧草連天欲待誰疑烟疑霧斜陽渡
送君一闋楊柳春銷魂客路水鱗鱗知君憑弔鳴夷處
一作去 髣髴吳宮歌舞人

寄懷子畱方二

江南通志方授字子畱嗜學工詩晚年入四明山中結茅而棲

樅陽突兀射蛟臺江流九派大孤來美人娟娟隔春水

徘徊烟霧真仙才錦衣寶劍青一作黃 驄客千金一諾重

顏色與君頗似肝膽交風塵四海空相憶我汝年皆十

五餘江南江北稱神駒文章一顧雲烟動自視一作愧 風

流頗不如王師已報江州捷上流帆檣如滿月君家罷

虎臥江頭英姿颯爽真奇絕何年六師呼渡河金支翠

華歸東一作京 都鳳凰臺下璣璣月重結高陽舊酒徒

易水歌

白日蒼茫落易水悲風動地蕭條起荆卿入秦功不成
遺恨驪山暮烟紫昔年此地別燕丹哀歌變徵風雨闌
白虹翕翕貫燕市黃金臺下陰雲寒袖中寶刀霜華重

此事千秋竟成夢十三殺人徒爾爲百二河山儼不動
嗚呼荆卿磊落殊不倫漸離慷慨得其真長安無限屠
刀肆猶有吹簫擊筑人

博浪沙歌

東海波翻白日動秦仇慷慨天門慟倉海先生矢報韓
博浪沙頭風雨闌祖龍日觀登封還金泥玉簡嵩高山
道遇沙中鼓椎者副車決裂龍旂下此時一呼乾坤震
大索十日神龍隱秦亾朱組繫子嬰三戶復死韓王成
芒碭五雲天子氣遇雷風雨蛟龍意垓下烏騅楚霸王
鎬池白璧秦皇帝嗟乎哉大讐旣報奇功收拂衣願從
赤松遊英風颯爽滿天地素書三卷在人世

南越行送人入閩

案通鑑輯覽順治二年閩六月鄭鴻逵等擁唐王聿鍵至

閩黃道周張肯堂等奉聿鍵稱監國而擁立者豔推戴功卽定議稱號於福州改年隆武此詩蓋爲唐藩而作

古南越武夷天姥神靈穴蒼茫八柱倒江河沆漭三桑
扶日月況值中興定鼎還龍趨虎躍參差閒誰人奇遇
君臣際不願追隨供奉班知公意氣一世無當時寄與
真龍雛聖意九重方玉汝天恩一命執金吾五侯爭逐
真人意白璧黃金富門一作民第萬歲蓬萊舊羽林五雲
驃騎新司隸此去長風渡滄海天吳海若朝宗會爲送

鄂君青翰舫翻思漢帝金根蓋浮雲何事盡南征濛濛
行在不勝情第一樓爲龍虎闕內三山作鳳凰城五年
客邸曾遊所別來風景殊今古春城烟霧入樓臺曉日
雲霞動旗鼓此日東風送客塵車如流水水鱗鱗點君
兩袖霜華淚倘憶羈遲異國人

賦得王叔明武夷春色圖送閩人

一作送閩人

黃鶴山樵高臥起落筆雲烟千萬里畫作武夷春色圖
七十二峯烟霧裏登山臨水送將歸悲莫悲兮生別離
芳草連天明月出空山落照白雲微故人辭我南天去
海東雲接漳江樹錦樹飛花把酒時綠楊歸路傷心處
茫茫異域送南征兩淚如絲生別情武夷空翠如天際
夜夜隨君夢裏行

寄后張

案華亭縣志王爽原名聚星字后張康熙二十六年順天舉人二十七年進士

千山萬山芳草生千樹萬樹黃鸝鳴汝爲高堂不得來
我爲高堂不得行寂寞音書竟塵土昨聞後江新被兵
欲眠不眠愁夜半橫笛參差三兩聲

附錄王爽周釜山先生鶴靜堂集跋追憶考功塾中
弟子侍側先生命言志夏生存古曰其司馬長卿乎
爽曰其吾家景略乎先生瞿然顧爽曰噫孺子迺分
師席此誠吾所能當是時師弟子自命綦闕達哉豈
知白駒載馳智不及料夏生既弱齡兵死矣爽且
老而無所表見而先生一仕卽已卒未克大展

蔣生南行歌

案蔣生當是蔣大鴻紹興府志蔣平階字大鴻江南華亭人也明末

華亭夏允彝青浦陳子龍主幾社壇坫招致
海內文人見平階文大驚亟邀入社及明
唐王僭號於閩平階赴之授兵部司務晉御
史抗疏劾鄭芝龍跋扈福建破遂命服黃
冠假青烏之術浮沈於世東至齊魯登泰岱
謁曲阜轉徙吳越間樂會稽山水遂家焉歿
葬若耶之樵風涇

與君自別新寧邸世事渾如翻掌異馬江潮入大王風
旗山雲作真人氣我子風流世所知南瞻天闕更驅馳
九死不回歸國意百年重見中興時登山臨水車塵絕
海水天風恨離別飛飛征雁五溪雲行行立馬三一作吳
山月離亭尊酒白雲飛送子終宵露滿衣啞啞烏啼飛
上屋參橫斗轉星河稀

故宮行

朝登建康城暮宿丹陽道黃塵落日大江流紫陌微寒
故宮草故宮烟雨動新愁華屋參差成古邱當時羅綺
三千戶何處鶯花十二樓六代繁華如在眼真龍不動
河山轉春光縹緲景陽宮月色徘徊芳樂苑細雨深宮
花落遲輕風合殿香飄遠花香十里到平康莫愁歌舞
冶遊郎俠少盡騎青絡馬交遊爭繫紫羅囊鴛鴦兩兩
芙蓉沼鸚鵡雙雙玳瑁梁一朝景物如反掌富貴風流
竟長往玄武池邊暮雨來朱雀門前春草長美女琵琶
塞上行綺構雲連空復情行人夜雨烏衣巷歸雁秋風

白下城登臨千載空回首陳井梁宮竟誰有遊鹿爭銜
上苑花流鶯自囀臺城柳臺城下接孝陵西無限枝頭
烏夜啼楊花風起過江去薄暮如烟滿大隄

送偉南南行兼訊王玠石

松江府志顧開雍字偉南華亭學貢監

董含三岡識略偉南少好學秀羸多才與陳夏諸公並起名滿海內晚築室數椽在跨塘橋外竹木森秀琴書瀟灑獨坐一室凝塵寂然前輩風流猶可想見也南匯縣志王光承字玠右華亭歲貢生品行修潔博學工詩文才名籍甚屢徵不就偕弟烈隱居新場躬耕養父不入城市者三十年無子依壻楊愴以沒

壯士賦無衣孤舟入翠微南風渡南海帆上白雲飛吳
淞江上浪花白故人分手淚沾臆海天飛盡故鄉雲惟
見蛟關暮山碧去入長空疾似無平津東閣紫雲扶策
馬爭看紅韎韜駕舟欲釣紫珊瑚美爾千金生意氣芙
蓉闕下空羣驥赤城梁外見王生幸君道復殷勤意

長歌

我欲登天雲盤盤我欲御風無羽翰我欲陟山泥洹洹
我欲涉江憂天寒瓊弁玉蕤珮珊珊蕙橈桂櫂凌迴瀾
澤中何有多紅蘭天風日暮徒盤桓芳草盈筐一作懷
所歡美人何在青雲端衣玄綃衣冠玉冠明璫垂絳乘
六鸞欲往從之道路難相思雙淚流輕紈佳殺旨酒不
能餐瑤琴一曲風中彈風急絃絕摧心肝月明星稀斗

闌干

題曹溪草堂壁

案曹溪在吾鄉崑山之北俗名曹溪至今夏氏有聚族者

崑山之陽谷水陰其中青翠深沈沈美人結廬在何許
松花濛濛翠微雨曹溪九折抱烟扉草堂天半白雲飛
挾策盡為門下士登壇半是里中兒風塵四海事戎馬
角弓寶劍珊瑚把新隄桃李爭春風連錢駿馬桃花紅
江頭義師黃石法門前健兒水犀甲壯遊不讓五陵豪
酒酣卻笑三河俠誰知頃刻雲雨翻死生漂泊烟波閒
舊時部曲尊前散昔日烟花夢裏攀沈沙一死干虹氣
遺恨哀哀蓼莪廢何地重開北海樽無人更灑西州淚
珠履三千食客稀玉盤十二齊盟悔我今亾命滄海遊
何年佩刀成報仇惟有園中雙白雀日日曹溪沙上啄
啄魚不得簸簸飛飛入園中啄紅藥

霸圖

清角一聲秋色裏玄霜白荻將軍壘紅旗半掩轅門紫
落日餘皇鼓不起英雄霸圖今已矣醉攜吳鉤為君死

翠華篇

自注此追紀聖安皇帝北

作也通

江南京大震福王荒宴至夜半跨馬自通濟門出走遂奔太平時黃得功收兵屯蕪湖福王潛入其營大清兵至蕪湖明總兵田雄劫福王由崧以降靖國公黃得功死之明亾

馬如雲動地來御舟太液采蓮回玉腕蛾眉遲不動

金鞭鐵騎暗相摧九門龍馬夜銜勒魚鑰沈沈淨如拭
平日千官上殿來螭頭羽扇無消息白鷺洲邊駐彩旌
鸞輿已幸靖南營月姬吹笛眠金殿漢將降戎到石城
紫騮十萬 獵孝陵草木青烟歇芳樂苑中啼鳥稀
景陽宮外行人絕綠沈重甲右 王將軍匹馬來相當
獨壘天清江月白孤城戰苦陣雲黃烏啼城頭風簸簸
八千子弟帳下哭君王銜璧出轅門落日悲風滿姑孰

黃鬚奏凱歸

九朱組受降回秦淮渡頭父老泣

閣道車中帝子悲殿前匍匐三頓首明駝快馬追風走
一作手兩行紅粉舊宮人健兒折盡臺城柳一輛輶車翠

華北黃河東流聲淅淅愁絕風塵

一作雲

不敢言江南天

子黃龍客漢宮佳麗抱琵琶皓齒紅顏塞上沙最憐齊
殿金蓮步恨殺陳宮玉樹花桑田碧海須臾改歌舞流
光不相待夢到當年羅綺場鍾山半落斜陽外

蘆花篇

去時蘆葉碧如染歸時蘆花滿江轉亂逐輕風薄暮飛
細飄曲水凌波淺頗類瀟湘放逐臣翻似江湖羈旅人
王孫東去愁芳草公子西歸采白蘋當年羅綺秋光冷
一聲芳一作蘆管江天靜到此風塵客子心空留霜月蘆
花影雁聲嘹唳寒江白漁舟古渡吹橫笛烏啼月落淚

夏官集卷四
滿衣秋水連天獨歸客

明妃篇一作曲

紅粉三千貌不同傾城不買畫圖工
夜夜秋光長信殿年年春色未央宮
忽聞詔選賜匈奴絕代良家請嫁胡
錦袖乍嬌紅靺鞨金井長辭玉轆轤
如花慷慨違金闕紫臺薄命音塵絕
環珮朝辭漢殿雲璣瑜夜舞交河雪
寶馬行行歸朔漠酒酣還奏宮中樂
單于帳裏月華高燕支山下花光薄
銀箏錦拍按琵琶一代紅顏絕塞沙
待生青豕愁中草始信昭陽夢裏花

雪後懷后張子韶

案后張注見前子韶顧姓名九成見杜登春社事本末

猶憶去年大會時雪花紛紛飛滿席
夜半狂呼白玉卮酒酣醉倚黃金勒
當壚對酌晚文君露頂沈杯呼阮籍
誰知三月春風寒依然五夜瑤華白
當年結客少年場盡是窮途行路客
黃雲片片軒轅臺瓊樹枝枝長安陌
華堂空餘絲竹音雲山不辨風塵色
有客孤燈迴自憐敝裘百結無人識
梅花未落玉除寒柳絮深飛珠簾隔
爲問他年桂樹枝顧王二子嘗相憶

北風行

北風蕭蕭天地動聞闔不開雲欲凍
千里空來蜀國魂孤臣獨有蒼梧痛
鼎湖不見飛蒼龍阿閣何時棲赤鳳

鳩鵲灰沈碧瓦寒芙蓉塵滿金鋪重忽聞殿上大長秋
云是先朝老供奉紫衣兩袖淚痕斑奉詔新陵望祭還
去年今日香烟合此地他鄉玉盃殘邱地洛陽新俎豆
陵園天壽僅雲山錦袍灼爍君王語麥飯淒涼帝子顏
萬年枝上春何處三雲殿前夜未闌憶昔羣臣齊上殿
稽首稱觴賜華宴至今蔓草委金根空餘明月遲芳甸
西陵盛姬魂已寒南浦湘君淚如霰蕭條陵樹落空巖
慘淡宮花閉深院百官俯首盡傷心萬姓深山齊掩面
嗚呼蘭膏桂火何氤氳石城高映流層雲元戎誰度黃
河曲前驅不合漁陽軍獨望新陵一抔土猶畱宿草雙

龍文故國臨風吹霜雪當年薄海歌南薰回首燕山舊
宮闕先皇十載獨殷勤

放歌贈吳錦雯兼訊武林諸同志

浙江通志吳百朋字錦雯錢塘人壬午舉於鄉丁酉調選司李蘇州獄訟平反以簡抗見罪中考功法明年乃得白復補肇司李缺裁補南和令當佐兩郡時有強項司李聲令南和一被以慈惠未幾卒於官王暉今世說錦雯少奇敏操筆為文數千言立就令南和病沒百姓建祠祀之

天風一吹海波立錢塘東去錦湍急片片春帆細雨中
西泠曉發西興入憶昔當年遊武林布帆絲纜清江深
畫船簫鼓臥涼月朱樓烟霧生秋陰此時年纔五六許
但覓梨栗未解語便知天下有吳生西陵花月風騷主

先公風表漢三君珠履三千畫掃門逢人便下南州榻
 滿座還開北海樽吳生此時席中見十載神交空半面
 援筆千言凌紫霞元龍湖海人人羨那知一別三年來
 聞闔不開生塵埃荆榛古殿銅駝臥弓劍荒陵金雁哀
 抱石千秋葬魚腹王褒泣血羊曇哭屠簫猶解問夷門
衣冠半已更服
 風塵相遇客為家齊拂雙龍劍上花埋名同隱屠羊肆
 忍死須臾博浪沙華堂明燭良宵會金樽斗酒離人醉
 醉裏論心敢放歌夢中分手還流淚幾回憑弔舊山河
 形勝蕭條可奈何伍胥祠前暮潮滿蘇小墓邊秋草多
 嗚呼陸郎玉樹埋黃土小陸風流隱屠賈柴生賣藥不
 二價徐子披裘鬻五穀君歸有語幸相傳忘憂長向酒

家眠今年白社相招處回首黃壚竟惘然悲歌卻話先
 朝事抗眉休負生平志乘風一尋倉海君歸來訪汝吳

門市 王褒句下舊本脫
去四句今補入

細林野哭 案青浦縣志細林山舊名神山徐世
禎陳臥子年譜甲申五月南都陷臥
子同沈司馬雲升倡守郡城破避西泖六
寫灣遭祖母喪瑩於廣富林遂廬居其里鬱
鬱不得志幅巾布袍往來神奈兩峯間多感
懷之作又案臥子晚號於陵孟公宋轅文徵
輿有傳則此詩為臥子作也明末忠烈紀實
陳子龍字臥子一字人中松江人崇禎丁丑
進士授惠州推官改紹興東陽許都亂子龍
單騎往諭之解散其眾以招撫功擢兵科給
事中不赴南渡起原官子龍言自古中興之
主如少康周宣皆躬親武事以克仇邦三代
以後漢之光武唐之肅宗莫不身居法宮之中
車數駕故能光復舊物未有身居法宮之中

優游處順而可以戡定禍亂者也今者人情
世沓不異升平從無有哭神州之陸沈念中
原之榛莽者臣瞻拜諸陵依依北望不知十
二陵尚能無恙否而先帝先后之梓宮何在
與言及此陛下當嘗瞻臥薪宵衣以報仇雪
恥是務庶中原可收而舊京可復也竊聞出
東河北義旗雲集咸拭目以望王師朝廷宴
然置之度外何以收三齊技擊之雄慰燕趙
悲歌之士乎臣恐天下知朝廷不足恃不折
而歸敵則豪傑皆有自王之心矣伏望陛下
速駕幸京營大閱之復弭節江許大集舟師
分命輔臣一至蕪湖一至京口以視險要固
根本使天下曉然知陛下至京口以視險要固
發歸重淮泗令一軍由歸毫以入汝維次潼
關一軍由襄鄧以攻武關出襄漢巴蜀之甲
燕晉之師則用之為奇兵為聲援逆賊授首
可計日待矣又言防江之策莫過水師海舟
之設更不容緩又言備要三邊又言收復襄
陽皆當時至計莫之能用也甲申八月請假

歸里南京不守閏六月十日松江起兵子龍
設太祖像誓眾沈猶龍稱總督兵部尚書子
龍稱監軍左給事中延至水師總兵黃蜚吳
松副總兵吳志葵故巡撫王家瑞蘇松道李
向中等為城守計閩中授子龍兵部左侍郎
左都御史東浙授兵部尚書節制七省漕務
八月三日李成棟破松江子龍逃匿無何吳
勝兆反解總督窮治其獄詞連子龍子龍與
夏之旭同奔嘉定告急於侯岐曾匿其僕劉
馴家已遷崑山顧天遠所捕至嘉定執岐曾
以去而總兵巴山別遣兵圍天遠家遂獲子
龍鎖於舟中泊跨塘橋下子龍乘守者不備
躍入水死以
下二首南冠草

細林山上夜烏啼細林山下秋草齊有客扁舟不繫纜
乘風直下松江西卻憶當年細林客孟公四海文章伯
昔日曾來訪白雲落葉滿山尋不得始知孟公湖海人

荒臺古月水鄰鄰相逢對哭天下事酒酣睥睨意氣親
去歲平陵鼓聲死與公同渡吳江水今年夢斷九峯雲
旌旗猶映暮山紫瀟灑秦庭淚已揮髣髴聊城矢更飛
黃鵠欲舉六翮折茫茫四海將安歸天地跼踖日月促
氣如長虹葬魚腹腸斷當年國士恩翦紙招魂為公哭
烈皇乘雲御六龍攀髯控馭先文忠君臣地下會相見
淚灑閭闔生悲風我欲歸來振羽翼誰知一舉入羅弋
家世堪憐趙氏孤到今竟作田橫客嗚呼撫膺一聲江
雲開身在羅網且莫哀公平乎公乎為我築室傍夜臺霜
寒月苦行當來

吳江野哭

案此詩為吳日生作明末忠烈紀實

矜奇兼好兵法崇禎十六年成進士不謁選而歸明年聞北都失守感憤作恢復議四篇職方主事監紀軍前甚有勞績明年督餉吳中未還而揚州失已而吳江亦失遂與同邑孫兆奎等號召舟師聚眾數千人復吳江屯軍長白蕩大兵來討易用計獲勝唐王聞之授兵部右侍郎兼右僉都御史總督江南諸軍事楊文驄奏易斬獲多進為兵部尚書魯王亦授易兵部侍郎封長興伯八月總兵吳勝兆以舟師至易出戰塘口獲舟二十艘次日大雨不設備為大兵所敗易子身走父承緒妻沈氏及女皆溺死丙戌春鄉人周瑞聚兵復起長白蕩迎易入營其秋易至嘉善與職方倪撫合營集飲孫璋家大兵猝至易被執至杭州戮於草橋門

江南三月鶯花嬌東風繫纜垂虹橋美人意氣埋塵霧

門前枯柳風蕭蕭有客扁舟淚成血三千珠履音塵絕
曉氣平連震澤雲春風吹落吳江月平陵一曲聲杳然
靈旗慘淡歸荒烟茫茫滄海填精衛寂寂空山哭杜鵑
夢中細語曾聞得蒼黃不辨公顏色江上非無弔屈人
座中猶是悲田客感激當年授命時哭公清夜畏人知
空聞蔡琰猶堪贖便作侯芭不敢辭相將灑淚銜黃土
築公虛冢青松路年年同祭伍胥祠人人不上要離墓

夏節愍全集卷四

夏節愍全集卷五

青浦王述庵先生鑒定

婁縣莊師洛純川輯

受業

陳均秉衡編
何其偉韋人

五言律詩

武塘元日和篆鴻

阮元兩浙輶軒錄蔣玉章一
名篆字篆鴻嘉善人玉立弟

嘉善縣志篆九歲能詩順治辛卯中
副車不得志卒著有三徑草靈威集

故鄉東望遠客裏度新年霧隱江花發烟深戍柳眠青
樓空十二白髮竟三千漢國河山在春風若箇邊

花朝約漱廣遊鄒仲堅園亭阻風雨有作

欲渡芳洲去蒼茫迴不通樹迎神女雨花避大姨

一作
五

風隔水同千里浮雲合九峯王孫愁日暮春草碧烟中

寒食掃墓

遺恨荒原綠東風闐闐開龍蛇知火息鴻雁及春回芳
草新烟積輕花舊雨來王褒私一作初教授長起蓼莪哀

偶見荆隱舊莊殘英未落餘露泣然賦示武功

二首

案武功為節愍女兄荆隱之子荆隱注見卷三侯氏族譜蔡文中公子字武功少負雋才有神童之稱崇禎十年生順治十年卒年僅十七婁東周博士肇有祭侯伯子武

文功

舊日風流地園亭日夜開金樽移草木綺席隱莓苔西
苑三春靜東風百鳥哀輕花偏不落如待玉人來

四海盡風塵桃源欲問津風來香入座月靜錦成茵花

鳥酬知己雲山待主人王孫歸去後春色到東一作南鄰

附錄侯槃酬別徐介白詩滄江倚櫂且高歌遊子銜杯意若何亂後飄零親戚少天涯蹤跡別離多已悲楊柳愁中折況遇賓鴻客裏過握手相期須努力風塵十載莫蹉跎

偶與昭南女弟談懷荆隱女兄

不堪春色一作已盡卜宅到江潭空谷傳三隱余號小隱昭南號蘭

名閨美二南荆隱字美南占風知少女鬪草佩宐男遙憶

大姑處天花動草庵

畱別

與汝三春別離亭奏管絃鶯啼芳草外燕乳落花前殘

杏飄紅雨垂楊隱綠烟年年愁滿地此去更淒然

晚眺有憶

不繫扁舟久

一作去

登臨淚滿纓暮雲山外斷春水月中

平

一作明

蔓草雲閒戍輕烟海上城佳期空冉冉遲暮若

爲情

登樓

極目兵戈際登樓暮轉哀月明揚子渡江鎖越王臺歸
鳥衝林起輕烟隔岸開五雲飛不盡知是帝鄉來

杖策

杖策獨行吟悠然思故林雨來千樹暗日落九峯深寂

寂荒烟草迢迢起暮陰曹溪何蕩漾猶有白雲心

夏日雜作四首

五月池塘好幽欄木槿開羽觴飛乳燕銀甲坐新苔黃
鳥樽前換青山雨後來遠人期未至日暮獨登臺
歲華忽已半歸國計何如落日低秦望青山入禹餘滄
波空際遠天闕望中虛自恨浮生拙臨風欲羨魚
花草醉醱醱江山恨別離浮家隨白鷺行野聽黃鸝片
雨征帆入孤雲遠樹移瑤琴流水意誰是古鍾期
烟水寄輕舸傷心正鬱陶朱霞江草動春雨石華高行
似思鱸膾名猶愧鳳毛五湖風色好愁絕水滔滔

重過曹溪

暮雨灑空林黃鸝自好音未申歸國意徒有報君心戰
伐青山在風塵白髮侵曲江如有意髣髴翠微岑

一作翠華陰

對月憶南行者

案是時節愍方拜唐藩內史之命具疏福州而作

自拜南州使清光幾度看滄洲天際晚芳草月中寒屬
國思歸漢嫖姚擬築壇不知江上雁何日到長安

送友北行

故國江山在孤臣意若何滄江驚白髮芳草渡黃河汝
自懷裘馬余還恨斧柯高皇豐沛地愁絕大風歌

軍中有作

一本無軍中二字

漢家程不識刁斗拂月霜青翰依藩伯彤箴愧省郎涼
颿歸細柳旭日自扶桑湖海多豪氣幽懷兩不一作忘

得漱廣訃

案嘉善縣志漱廣少負雋才年二十七卒有思存集

忽得胥塘訃傷心自白頭龍蛇千古夜猿鶴萬山秋閔
亂劉琨恥招魂宋玉愁無情天目水不解向西流

同恂如因培兩外兄舟宴寄別鑑開家舅

入幕思投筆沾衣愧請纓盤龍呼入陣公瑾笑談

一作論

兵烟樹連雲羃江湖弄月生一聲離笛晚無限渭陽情
卽事三首

復楚情何極亾 氣未平雄風清角勁落日大旗明縞

素酬家國戈船決死生月笳千古恨一片月臨城
戰苦難酬國仇深敢憶家一身存漢臘滿目盡 沙落
月翻旗影清霜冷劔花六軍渾散盡半夜起悲笳
一旅同仇諍三秋故主懷將星沈左輔卿月隱中台東
閣塵賓幕西征愧賦才月明笳鼓切今夜為誰哀

歸途夜泊

谷水重遊地悠悠獨此心落星依古戍斜月半幽林客
散夷門市愁深澤畔吟夜闌人語靜倚檻露沾襟

送杜于皇歸故郢

江南通志杜濬字于皇黃岡人明諸生僑居白下以詩名而自景陵鍾氏譚氏矯王李規摹漢魏之習流而入於淺薄獨濬不染楚風著變雅堂集案

漁洋詩話于皇一字茶郵

分手金陵道相逢倍黯然鶯啼楊柳岸人在木蘭船客
路三千里征衣十二年計程歸夏口明月兩回圓

附錄盧見曾感舊集補傳案茶郵與周櫟園諸名士觀燈於秦淮櫟園出百金置席上為采賭鼓吹詞茶郵遠起攫之曰鮑叔知我貧也就吟席振筆直書立成長歌一百七十四句一座為之傾倒晚年貧益甚往來淮揚間客死金陵陳滄洲鵬年作守乃葬於太平門之麓

旅夜聞雁

旅館孤燈夜愁吟步玉墀秋風人去後烟水雁來時暮
嶺歸雲斷寒沙落月遲平生湖海意三繞向南枝

哭吳都督六首

案吳都督注見卷五

星隱中台坼天高北斗斜陣圖傳鶴鶴戰地隱龍蛇故

壘虛寒月靈旗捲暮霞五湖風雪夜尊酒哭平沙

幕府歸何地孤臣血未乾杜鵑江月苦精衛海潮寒烟

草空殘壁雲山舊築壇孟嘗賓客散齊鉞為誰彈

知己功名盡傷心叩九閭餘光留日月遺恨滿乾坤湖

海門生說荆榛國士恩滔滔江水闊萬里獨招魂

丞相門誰掃公孫閣不開白龍千古恨黃犢幾人哀江

海猶生氣風塵未盡才雲旗排浩蕩毅魄獨歸來

野哭樵蘇徑浮家戰伐年畫圖空一作傳督亢虛豕像祁

連白草荒春月青燐大澤烟漁燈明兩岸猶是水犀船

感交悲故吏繞指痛孤臣有客留滄海無人哭壽春王

孫城下飯公子屬車塵知己今誰報高歌泣鬼神

避地四首

世事竟如此悠然歸我廬飛花三畝宅落葉半牀書遠

岫橫雲斷空江積霧虛太玄空寂寂誰是子雲居

飄零生計薄家在太湖西夜月歸三隱春風動五噫閒

庭雲不到芳樹鳥先啼應有避地行人路已迷

曲徑花何處芳樽酒不空明霞封谷口落日滿山中入

市逢梅福遊仙訪葛洪滄浪何地穩晞髮問牆東

枕中何所有寂寞註黃庭何日非沈醉誰人忌獨醒乾

夏官具全集 卷五
坤雙眼白江海一帆青浩蕩馴魚鳥輕鷗立暮汀

寶帶橋二首

寶帶橋邊泊狂歌問酒家吳江天入水震澤晚生霞細

一作綺纜迎風急輕一作春帆帶雨斜蒼茫不可接何處拂

靈槎

連天芳草青極浦獨揚舲歸雁舟前落愁人夢裏聽花
光明曉霧波影亂春星欲訪威靈穴孤帆入洞庭

都會八詠

順天

舊時雙闕曉陰雨翠華來白玉螭頭仗黃金駿骨臺宮

雲浮睥睨殿月鎖莓苔太液波翻後魚龍夜夜哀

應天

吳楚茫茫盡神靈日暮趨大江春水闊京口夜雲虛芳
草三山恨斜陽六代餘孝陵回首處慘淡斗牛墟

西安

無限章臺柳行人幾度攀秦城空四塞漢殿鎖三關荒
草龍蛇囿浮雲虎豹閑雁飛銀海瀉千古恨驪山

開封

豫州千里國京闕萬年宮北雒周謨重東都漢賦雄梁
園秋竹雨漳水夜臺風歌舞西陵歇黃河落照中

臨淄

青兗名藩地臨淄十萬都秦碑沈古壁魯殿人平蕪日
觀春縹緲天門晝有無黃河如帶白千里自模劬

太原

高接天關險恒山入晉難黃雲知塞近白草入春寒龍
首河三折羊腸路九盤長垣欣不落寶劔為誰彈

成都

巴子三迴國成都萬里橋雙江春浦漲一帶曉天遙青
鳥高唐雨黃牛灩澦潮升沈虛寂寞卜市竟蕭條

武林

錢塘佳麗地楊柳露新條吳越分烟樹江山擁絳霄月
明蘇小墓風怒伍胥潮滿眼滄波急旌旗鎖寂寥

從陳軼符年丈遊細林山館

案殷頑錄陳子龍號軼符事詳卷四

載酒扁舟疾春風不滿帆酒家藏夏馥漢臘問陳咸浩
劫桐君籙明星玉女函登高湖海盡愁絕倚松杉

附錄陳子龍游神山道院詩玉殿丹青出立宮碧巘
浮重梯凌絕磴萬堞隱危樓鶴下星壇冷花飛石洞
幽羣仙何處接
滄海自悠悠

秋夜感懷

登樓迷北望沙草沒寒汀月湧長江白雲連大海青征
鴻非故國橫笛起新亭無限悲歌意茫茫帝子靈

元日大霧二首 丙戌

萬里河山氣蒼茫霧不開忽逢三朔至疑有百靈哀漢
日分南極月沙隱大台回中春色滿想像翠華來
漠漠蒼龍闕黃雲迴不收去年今日事此地昔人愁鳥
雀朝三殿風塵辨九州扶桑新氣象玉冕拜通侯

人日懷舒章

南匯縣志李雯字舒章邑諸生父
逢申官工部主事遭誣謫戍雯旬
旬走京師訟其冤甲申父殉闖難雯募棺斂
之饘粥不進者累日本朝定鼎內院諸大
臣憐其孝且知其才
薦授宏文院中書

帝京 馬暗人日故人違御柳金隄是宮花玉燕非傷
心子山去何日少卿歸猶憶河梁別春風淚滿衣

別雲間 以下十首南冠草

三年羈旅客今日又南冠無限河山淚誰言天地寬已
知泉 一作 路近欲別故鄉難毅魄歸來日靈旗空際看

拜辭家恭人

孤兒哭無淚山鬼日為鄰古道麻衣客空堂 一作 白髮
親循陔猶有夢負米竟誰人忠孝家門事何須問此身

寄內

憶昔結褵日正當擐甲時門楣齊闕闕花燭夾旌旗問
寢譚忠孝同袍學唱隨九原應待汝珍重腹中兒

寄荆隱女兒兼武功侯甥

案武功
注見前

門閥推江左孤忠兩姓全一作十年黃鵠詠三載蓼莪

篇愧負文姬孝深為宅相憐大仇俱未報仗一作爾後

生賢

附錄計東嘉定侯氏宗祠記自給諫起東公於天啟初年首攻客魏奉嚴旨譴歸直聲動天下於是東南人士咸依嘉定侯氏為人宗而公之子二瞻先生通政公給事公先以政事名德顯公之子二瞻先生通政公文節公公之孫海內稱六侯者記原文中幾道研德雲俱智舍公之曾孫武功相繼以忠孝大節文章經術顯於是我東南人士稍稍知讀書論交矜行誼者莫不益嘖嘖稱嘉定侯氏云

東半邨先生

樂令竟如此王郎又若斯自羞 獄鬼猶是羽林兒月

白勞人唱霜空毅魄悲英雄生死路卻似壯遊時

聞大鴻仲熊訃

蘇州府志顧天達字大鴻貢生天達字仲熊諸生崑山人大學士鼎臣元孫延安府推官咸正之子順治丁亥上海諸生欽浩通款舟山疏吳中忠義士二十三人首及咸正乃與同事四十餘人并死天達兄弟亦以藏陳子龍故俱死

叩闔應有路兄弟竟齊遊盱眙同時盡裏融一日收黃

壚人已變清淚夢中流如赴增城約停驂待楚囚

毘陵遇轅文

一本作毘陵道中別宋轅文南通志宋徵輿字轅文華亭人順治丁亥進士以文章風雅著稱少與陳子龍李雯選訂明詩學者宗之督學閩中所拔皆單寒士歷副都御史

宋生裘馬客慷慨故人心有憾畱天地為君問古今風

塵非昔友湖海變知音灑盡窮途淚關河雨雪深

夏官恩全集 卷五
被羈待鞫在皇城故內瑤宅

孤臣魂已斷，況復見長安。
歌舞愁雲散，池臺落日寒。
重來中貴宅，空掛侍臣冠。
一片銀鑰影，還同劔佩看。

御用監被鞫拜瞻孝陵恭紀

城上鍾山色，松杉落翠微。
朝光羣鳥散，暝色二龍飛。
壁月沈銀海，金風翦玉衣。
孤臣瞻拜近，泉路奉恩輝。

七夕步蠡水先生韻

忽然秋滿地，愁裏度良辰。
有酒還同醉，無衣豈獨貧。
月明河鼓動，露落海閭新。
欲就君平卜，升沈數未真。

五言長律

代人贈鎮府

頒封周正朔，承制魯元年。
再造由人力，中興賴賢山。
河分爵土嵩，岳任藩宣德。
以君臣協才，非文武偏六。
還鎮澗八柱，獨承天日月。
雙珪合乾坤，一氣懸上公分。
劔履大將駐，旌旃外宅三千隊。
中軍百六一作八百椽，鮫皮橫海節。
犀炬伏波船，金角催鳴鼓。
牙旗滿控弦，帆圍江月小。
陣闊海雲連，每御黃龍出。
齊歌朱鷺旋，禹餘糧載圯。
秦望石生烟，鎮海遙通蜀。
藩封直到滇，投醪均下伍。
彈鋏滿中涓，位在通侯長。
身為諸將先，如雲起吳越。
指日度幽燕，渤海宐銘石。
狼胥更策鞭，扶桑扶日上大樹。

夏節愍全集卷五
大風前陰雨膏羣姓晞陽被九泉元功存社稷遺澤在
山川方叔基常武言歌江漢篇

夏節愍全集卷五

夏節愍全集卷六

青浦王述庵先生鑒定

婁縣莊師洛菴川輯

受業 陳均秉衡 編 何其偉韋人

七言律詩

讀陳軼符李舒章宋轅文合稿

案軼符舒章轅文俱注見卷五

十五成童解章句每從先世託高軒庾徐別恨同千古

一作蘇李交情在五言雁行南北誇新貴鷁首西東憶

故園獨有牆頭憐宋玉不聞九辨弔湘沅

春興八首同錢大作

上苑東風試早鶯故宮依舊百花明江帆入鏡移瓜步

夏會集卷之二
馬如雲走石城金鼓平陵憐翟義旌旗滄海葬田橫
傷心中夜看牛斗醉把吳鉤萬里行

自憐十載誤儒冠獨釣滄波行路難雨後新花宜夜醉
月中寶劍試春寒臨江烟樹分吳壤隔岸旌旗擁漢官
聞道扶桑天子氣何人不向五雲看

池塘楊柳綠陰垂烟雨飛花滿院悲三月曉迷吳苑路
萬年春靜禹陵碑江潮夜夜呼精衛草樹山山哭子規
最是關情無限恨月笳偏向月中吹

谷口桃花何處繁

一作是

武陵猶有避秦源江頭采葛供

句踐堂下幽蘭祭屈原春夢卻隨千里雁夜愁不斷萬

山猿今年寒食昌平路蔓草東風十四園

萬頃滄江未卜居風塵生計問樵漁錦帆寂寞吳趨曲
石室淒涼越絕書回首故鄉春夢裏傷心荒草夕陽餘
南朝鐘磬三千界一帶蒼烟散紫虛

河山風景淚堪揮江上傷心對夕暉蜀道盡悲諸葛死
漢家猶望少卿歸五湖義士蓮花劍七郡良家柳葉衣
結客少年情不淺平林裘馬放春圍

建業河山萬里遙烟波天際出金焦星辰夜隱移南極
江漢春翻鎖北條羽獵自高京口樹鶯花不度廣陵潮
琵琶馬上愁月語青冢年年恨未消

片帆春色滿江湖震澤神靈動有無曉氣橫開連百粵
晴光迴落見三吳飄零烟雨招漁父躑躅風塵問酒徒
知爾中宵沈醉後清霜長嘯拂伊吾自注此首兼贈漱廣

錢長孺三春臥病合卷而起詩以嘲之嘉興府志錢黯

字長孺嘉善人土晉孫順治乙未進士授池州推官以註誤罷職益肆力經史百家書法追二王兼善澹墨

九天環珮石榴裙翠幌妝樓謁細君花入珠簾紅雨過
香通霧縠紫烟分秦樓曉出東南日巫峽春歸朝暮雲
賦就感婚蠲渴疾不須重作釋愁文

夢懷長公郭侍御五竺崔舍人案侍御當是郭六修明史彙列

傳郭維經字六修江西龍泉人天啟五年進士授行人崇禎三年遷南京御史疏陳時弊極稱劉宗周之賢力詆王永光谿刻帝置不問吏部侍郎張捷薦逆案呂純如維經疏劾又劾撫寧侯朱國弼貪殘皆不納憂去久之起故官福王立進應天府丞仍兼御史巡視中城維經上言一以辦賊復仇為事尋遷大理少卿左僉都御史給事中明年二月隆平侯張拱日劾之乃下部院勘議令回籍唐王召為吏部右侍郎兼大兵圍贛州乃命維經為吏兵二部尚書兼右副都御史總理軍務督師往援維經入贛州與楊廷麟萬元吉協守及城破維經入嗟哦寺自焚死崔舍人未詳

乾坤戎馬倚吳鉤猶憶當年太姥遊夢裏雲霞雙鳳闕
醒來烟水一作一漁舟窮途知己誰青眼歧路傷心已
白頭遙想天南新侍從茫茫滄海動新愁

生平口號

生平無計更依劉短髮蒙茸愧楚囚十載鶯花遲暮客
三春烟雨別離愁浮生蝶夢莊周榻壯志鴟夷范蠡舟
同學少年零落盡飄然江海一輕鷗

憶侯幾道雲俱兄弟

案幾道名元演雲俱名元

錄云江南失守嘉邑士民推峒會為主據城拒守大兵圍之吳志葵以七百人來援敗去城中矢石俱盡城遂破峒會拜辭家廟挈二子並沈於池

春城烟霧曉陰陰俯仰斜陽弔古今萬里河山猶故國
九京風雨自同心欲知真主觀司隸未見孤兒屬羽林
鶴唳華亭人沒後河橋一闕一作淚沾襟

四月七日寄研德武功叔姪去年此夕與二子

步月新堤得屈平卜宅之句不意竟成先文

忠之識園亭猶是而死生漂泊心傷矣

嘉定縣志侯涵初名泓字研德少補諸生博習經史落紙輒盡數千言從弟靜叀命有司名捕之涵挺身代繫久之事解寄跡吳市一時名士推主文社少與伯仲羣從並受經黃淳耀而涵尤為淳耀所引重

園林入夏雨模餽寂寞青門恨早孤雲水相從新白社
河山如隔舊黃墟一猶有張公子哀郢誰憐屈大夫
重到竹林等二阮風流還似去年無

簡顧偉南

案顧偉南注見卷四

楚客一作遊子天涯久不歸平津東閣有光暉紫鱸鄉味思
張翰黃耳家郵問陸機三省衣冠新墨敕百花烟水舊
柴扉夢魂夜夜蘭亭月驚起扁舟淚滿衣

有嘲

重闌欲避曉風悲烟霧茫茫柳半垂歌舞微風青雀扇
興亾斜照赤烏碑不容東舍王昌嫁卻許西鄰宋玉窺
正是江南行樂地清商一曲爲誰吹

東遺民沈師弘濟

婁縣志沈楫字宏濟弱冠補諸生經明行修夏允彝命子完淳師事之中年家日困乃北遊燕齊名公卿咸敬禮之晚歸故里年已耄日書千字文易錢千文爲薪水資

微風南浦暮烟通落日西山素影同歧路見憐青眼客
知心惟有白頭翁交情牢落乾坤外舊業荒茫戰伐中
萬里行蹤渾未定水雲何處不相逢

舟中憶邵景說寄張子退

案邵景說注見卷三張子退名密軌端子

乙酉恩貢生官南京兵部司務

登臨澤國半荆榛戰伐年年鬼哭新一水晴波青翰舫
孤燈暮雨白綸巾何時壯志酬明主幾日浮生哭故人
萬里飛騰仍有路莫愁四海正風塵

柬玄照家孟

天涯兄弟掩柴扉故國遺民共采薇江海何年傳錦字

風塵吾黨半緇衣帝秦蹈海人猶在復楚依牆事已非
日暮雁行愁欲斷鵲鴿原上白雲飛

贈徐似之侯智含

明詩綜徐爾穀字似之嘉興人國子監生坐事被逮死白

門又侯濤字智含嘉定人有孝隱遺集嘉定縣志濤嗣曾幼子年十一補諸生後以命死案社事本末智含以家難付拂靈隱年止二十死於禪關

烟波寂寞問樵漁五月柴門獨著書草澤何年平逐鹿
江湖無地泣枯魚九章哀郢人如在三戶氣不除
先世交情千古事天門咫尺倍欷歔

偶念三秋舊集憶景說兼越行諸子

飄泊笙簧阻夢思蒼茫雲水更誰知遙憐白下千秋會

頗學黃初七子詩滿目塵迷北闕傷心越鳥向南枝

邵生黃土風騷盡三復遺篇尚可師

人日與篆鴻同賦

案篆鴻注見卷五

人日登高對酒壚春風款段試平蕪歲時東帝青陽節
兒女西王彩勝符古道雲山空際遠芳洲烟草望中無
歸人落雁花前恨卻憶高陽舊酒徒

贈衍門上人

案衍門未詳其名王雲續陳黃門年譜乙酉八月先生在陶莊之水

月菴託為浮屠菴僧衍門甚相敬禮

法雲無際化城陰錫杖凌空不住心春滿樓臺通北郭
天高笙磬隱東林雨中花影空階靜風外鐘聲隔浦深

白社遠公如見問山中謝客倦登臨

贈西瞻上人

嶺鶯安禪第一流迢遙香積古城頭曉鶯宛宛薰風細
春草陰陰宿露浮閉戶不知玄度到買山常與道林遊
白雲深處無家客花下談經問比丘

東郊

遊子登臨淚滿纓東郊景物不勝情流鶯曉樹新烟積
細草春隄宿雨明江上畫船乘霧去陌頭寶馬踏花行
當年一笑風流盡虛得紅顏薄倖名

春興四首

花落長干起暮濤傷心極望步蘭皋梁園雪後朱旗繞
魯殿烟中赤羽高新雨江邊埋白骨故營淮口暗青袍
請纓爲問誰家事漫酌春泉聽伯勞

雕籠燕子逐芳菲烟景平康動翠微二月長隄香草靜

三春古道客鴻稀龍沙雨濕桃花馬雞塞風輕柳葉一作

汗衣堪歎旌旗明一作迷北地殘梅猶一作應傍戰場飛

冠帶追隨滿帝京黃金臺畔五雲明焚香謾謁含元殿
賜錦誰開大宛城鼙鼓晨連弓劔氣龍綃夜隱珮環聲
漁陽烽火何時息百轉東風御柳鶯

春光搖曳古揚州宛轉東風十二樓洛浦鸞笙疑子晉

嵩山鶴馭夢浮邱黃鸝數轉疏楊裏玄燕雙飛古陌頭
芳草堪憐幽谷老玉關何事問封侯

江城

江城五月動哀一作清笳一片塵到海涯沙漠一作幕未

消前帳雪景陽先發後庭花征帆夜雨難歸國寶劍寒
霜已破家遙望黃龍愁故主李陵碑上暮雲斜

贈舊闕李憶蘭

無定河邊起暮笳受降城外逐輕車射鵬雲度金微落
回雁風高玉帳斜老去吹寒秦箏歸來彈徹漢琵琶
當筵忽話遼陽事獵獵霜飛兩鬢華

夏日幽居三首

落日西山起暮烟芙蓉出水自田田百年蓬鬢風前換
一片征帆雨後懸白鷺孤洲烟裊裊黃鸝千樹月娟娟
幽扉習靜無人至讀盡南華內外篇

愁絕關山獨枕戈亂離生計託烟波雲車無路通閭闔
土室何心詠蓼莪走馬空城雲裏失一作出啼鶯深樹雨
中多不堪極目風塵際山鬼微寒弔女蘿

一片孤帆入洞庭兩峯曉夾具區青江樓月滿人皆醉
漁浦一作浦口風來我獨醒東髮羞同孫討逆佩刀欲指衛

丁零何年直于幕立馬燕然擬勒銘

得東報懷湫廣
風流不減五陵豪
夜夜樓頭太白高
瑤草輕寒歸蕙苑
石苔微雨動蘭膏
風連海氣通宸輦
日射江光入御袍
犬馬懸心真不淺
五雲如在聖躬勞

軍宴二首

十萬艨艟偃一作掩翠微
風雷黃石問兵機
月寒壁壘侵金柝
風入旌旗動鐵衣
自愧青藜陪客座
幸從細柳識軍威
轅門鼓角寒一作清宵醉
帳下南塘夜獵歸
星郎自愧早彈冠
天策從來貴築壇
娘子軍中春色醉
將軍樹裏月光寒
遲遲畫舫垂綃幕
款款行廚洗玉盤

我已破家酬大鎮
相逢斜拂劍霜看

訪友不遇

錦衣玉靶自翩翩
白羽瑠弓滿控弦
萬壑風迴寒角靜
千山日落大旗懸
冠軍油幕羞生數
好時雲臺最少年
乘醉扁舟尋鐵壘
牙門深鎖白雲邊

魚服

投筆新從定遠侯
登壇誓飲頭蓮花
劍淬霜重柳葉衣
輕漢月秋勵志雞
鳴思擊楫驚心魚
服愧同舟
一身湖海茫茫恨
縞素秦庭矢報仇

西弔湫廣至西塘有述

夏官集卷之九
九
谷水西塘兩地分雁行風雨恨離羣可憐玉樹埋青草
曾向金庭訪白雲縞素六師黃石法死生一戰水犀軍
知心惟有牙旗月夜夜依人恐是君

同友人過東道院

一片江聲入晚笳軍中高宴逐輕車幸倍紫塞將軍座
來訪黃庭道士家玉洞花明秋不夜錦屏雲起暮爲霞
此身竟逐征蓬去欲叩天門路已遐

鶉衣

鶉衣東去獨登臺歌舞軍中聽轉哀趙信城頭秋月滿
李陵碑上暮雲開吳江落日圍山盡震澤微風入陣迴

倉海一椎亾命後橋邊黃石待人來

題崑山水月殿

鶯嶺岩巖谷水陰崑山迢遞快登臨始知靈運尋山意
猶是曇摩泛海心古寺松聲清磬遠寒潭雁影碧雲深
青絲天棘風流在如見當年祇樹林

九日大風雨同智含夜飲

案智含
注見前

高秋夜雨不聞聲旅館孤燈酒自傾寂寞黃花千古恨
婆婆寶劍一身輕風塵握手同兄弟江海知心託死生
遙憶故園芳草路滿籬叢菊戰場明

道中作

山行三日萬山連今日纔開一面天石徑漸平看馬去
雲林初霽見泉懸無人主碓春偏急有婦當壚客易前
下筯不須錢滿百荔香新酒縮頭鰻

除夕追和廣成先生韻

案侯峒會別字廣成注見卷三

山河風景憶前年淚盡鮫人百斛泉鳳輦已空當日恨
鹿門深愧古人賢江湖潮信潛歸越秦晉風雲半入燕
况對九京如可作國讐家難問蒼天

附錄侯峒會甲申除夕感懷詩此夜真除異生年歷頭檢盡淚如泉漢家伏臘看遺俗晉代衣冠語後賢紫極問誰扶日月新亭應共望幽燕非關守歲通霄坐莫頌椒花媚遠天黃淳耀除夕次廣成韻風雪南轅憶去年雲山北望淚如泉戈揮白日真無力扇隔黃塵也自賢事業雲臺新宛洛畫圖督亢古幽燕

山中老宿閒談話擬續離騷一問天

元旦 丙戌

不知景物又新年無限傷心對九泉虎豹遊魂常作客
龍蛇守蟄更誰賢湘江寂寞空哀郢易水蕭條未報燕
白首同歸交誼重國殤兩 日南天

秋日避難膠東柬智舍

昨夜秋風起洞庭三山落木曉風輕親朋交態渾如夢
湖海生涯敢獨醒我已無家隨汗漫知君愁坐獨傳停
故人頻灑河橋淚南國招魂感鵲鳴

寄研德

案研德注見前

風塵大野日將曛滿眼悠悠獨識君潘岳已成懷舊賦
陸機還作辯亾文羞將短 供 服愁對寒山起暮雲
與汝相期遊白社孤鴻天外恨離羣

送馭閣蔣大南行

案蔣平階字大鴻一字馭閣注見卷四

靈旗髣髴朔風寒俠客悲歌迴不歡芳草多情兵甲後
白雲何處別離難滄浪漁父長哀郢倉海狂夫矢報韓
此夜一樽須盡醉夢中歧路恨漫漫

遇盜自解

浪迹烽

一作風

烟獨此身天涯孤客淚沾巾綠林滿地知

豪客寶劍窮途贈故人無復青氊王氏舊自憐犢鼻阮

家貧逢人莫訴流離事何處桃源可避

十二月十八立春

可憐又是豔陽時孤客征衫泣路歧草木不欣正朔
衣冠猶想漢威儀落梅入夜迎風急細柳知春遇雨遲
聞道海南多王氣扶桑先浴萬年枝

寄荆隱女兒

書劔天涯轉自親孤帆漂泊迴傷神自憐愁立寒塘路
獨恨行吟澤畔身黃土十年悲故友青山八月痛孤臣
當年結客同心者滿眼悠悠行路人

野哭

此首王澐作誤入

雜下聲名並李膺龍門天半許誰登秋風零落三千客
暮雨寒生十四陵毳帳近連青瑣闥明駝先踏玉河冰
魂飛故國知何處擊筑悲歌意不勝

感舊步仲芳先生韻六首

嘉善縣志錢棻字仲芳中丞士晉次子崇

禎壬午魁北雍性嗜學博通墳典暮年益健戶謝客著書於大滌山

故國鶯花滿地殘當年風景未應闌烟籠翠柳凌波靜
雨過紅梨入夢寒芳草已經迷曲巷春光依舊滿勾欄
江南一片傷心月多少琵琶馬上彈
五更星動角聲殘清酌沈沈歌舞闌蝴蝶夢中春月苦
杜鵑花外曉風寒如雲錦袖歸塵土卻月珠簾覆井欄

酒醒忽思嵇叔夜廣陵一曲更誰彈

夜靜孤城玉漏殘登樓長嘯客愁闌三年寒食催征夢
二月春衣試曉寒故國風塵空擊楫舊園花鳥獨凭欄
五陵年少歸何處匣裏雙龍不敢彈

曙鶯啼過百花殘客子無家

一作衣

泣夜闌錦瑟按來人

不見玉笙吹徹夢猶寒珮環曉醉芙蓉帳羅綺春嬌芍
藥欄回首風流成往事幾行紅淚暗中彈
舊都風物暗凋殘東海孤臣淚未闌睥睨浮雲三殿曉
梁慙落月九天寒宮花寂寂啼黃鳥御柳深深隱畫欄
裘馬京華零落盡鐵冠高臥有誰彈

蘆荻臨風故壘殘飄零湖海又春闌子胥江上吹簫苦
如意堂前擊筑寒雲淨一作靜平沙連碧浦樓空斜月上
朱欄孟嘗賓客隨烟草更向誰門倚鈇彈

寒食雜作同錢二不識賦四首自注末章兼贈不識案不識

注見卷三

朔風廣莫敝裘寒客子飄零行路難北首可憐秦郡縣
南來無復漢衣冠昭關去後難亾楚倉海歸時未報韓
袖裏吳鉤愁獨倚霜鋒夜夜月中看
親朋亂後幾人存湖海交情酒後論今古文章多薄命
江關詞賦半招魂王孫一飯誰知已漂母千金敢報恩

曾作信陵珠履客幾回慟哭大梁門

孤臣伏臘 天野哭茫茫幾歲年笛裏關山吹漢月

帳中霜雪滿月烟風塵獨上要離墓江海空浮范蠡船
雲水滔滔歸不得千金駿骨有誰憐

十年裘馬混風塵猶是先朝侍從臣采菊每邀彭澤令
看花不讓武陵人湘潭奇服憐哀郢錦水玄亭恥劇秦
故國銀魚新換酒玉壺秋泛莫辭頻

虎邱遇九高松江府志杜登春字九高崇禎辛未進士麟徵子

號讓水世居華亭青浦籍爲給諫張王治塔遂家太倉順治辛卯拔貢歷官處州同知著有尺五樓文集以下三首南冠草

竹馬交情十七年飄流湖海竟誰憐知心獨弔要離墓

亾命難尊少伯船山鬼未一作欲回江上夢楚囚一去草

如烟姑蘇明月愁人醉翦燭無言更惘然

附錄杜登春社事本末予年十三與夏子存古完淳王子后張奭輩於少年場中留意人物以社事為已任迄今事在目前已恍如隔世矣

由丹陽入京


萬里河山拱舊京楚囚西去淚如傾斜風衰柳丹陽郭
細雨孤帆白下城殘夢忽驚三殿報新愁翻覺一身輕
從軍未遂平生志遺恨千秋愧請纓

西華門與同難諸公待鞫

同舟今日半南冠魂斷雲山舊築壇仁壽鏡移江月落
景陽鐘動曉風寒誰將杯酒消獄卻向囊頭識漢官
相對銀鐙趨右掖夢中猶作侍臣看

附錄錢梅七夕獄中作對泣南冠度綺宵江鄉千里客愁遙雙星若識人間事也定淒然罷鵲橋

夏節愍全集卷六



漢書卷之六

五

